

台

學

統

台學統卷七十三

黃巖王 蔡輯

吳興劉承幹校

詞章之學二十

紀善鮑恕庵先生仁濟

赤城新志鮑原弘字仁濟太平人永樂中伊府紀善博

學能文所著有恕庵集

薦舉門 按此時尙未分縣當云黃巖人又名字互易亦當改

正

浙江通志鮑仁濟字原宏黃巖人嘗從陳鏗翁游鏗翁之學蓋攷亭支流也爲文精密雄健一主於理洪武間薦授樂清訓導永樂初授伊府紀善進治國要道十二

章數以直言忤王王不悅將中以危法仁濟先自歸京

師王旋敗得免所著有恕庵集

本台州府志

太平縣志鮑原宏名仁濟以字行號恕庵德賢子爲陳石門鏗翁高第弟子石門愛其才以女孫妻之平日以淹博聞爲文雄健精密一主於理洪武二十三年以明經舉授樂清訓導善淑人諸生來問難爲從容講解務通其旨與朱希晦趙新相唱和稱鴈山三老永樂閒陞伊府紀善進治國要道十二章遇事輒面爭不少隱王銜之欲坐以他事原宏遂白之朝伊庶人獲罪得無及嘗痛其師石門冤且乏嗣爲文招魂祀於家之別館俾妻陳氏主之終其身論者避之兄原謙名仁牧號受益

得詩法於釋禹迪嘗謂仁濟與諸名士角勝詞場森立  
戈矛堅陣待敵雖常捷終費周防吾卽以赤楮楮人人  
自側避仁濟笑而然之

按明史諸王傳伊厲王橧太祖第二十五子永樂六  
年之藩洛陽十二年薨未嘗廢黜至玄孫典模嘉靖  
四十三年禁錮高牆削除世封此云伊庶人誤以典  
模爲橧也又按雲松巢集序恕庵不及見朱希晦安  
得與相唱和稱三老乎蓋三老乃四明吳主一與朱  
趙也

紀善鮑先生墓誌銘

樂清訓導黃黼撰

赤城後集

伊府紀善黃巖鮑先生以永樂庚寅四月十九日卒於

京師將歸葬於某山之原其孤珙手疏先生事狀泣請  
余銘先生嘗司訓樂清縣學以身爲教其化大行余承  
乏茲學而先生方滿去雖不及會而聲光運氣猶存余  
竊歆慕不已其何敢辭按狀先生諱仁濟字原宏號恕  
庵其先仙居人宋武略將軍伍徙樂清之楊川五世祖  
復遷黃巖之三坑四世祖又自三坑遷居龍井里大父  
有隱德自號樂閒居士父性善名易學者宗之妣金氏  
嘗於四月八日產子不育後夢其子曰我今爲三坑盛  
氏家兒不樂於彼當於四月八日復生母家後果以是  
日生先生識者曰賢哲之生自與常人殊是子其異於  
人哉元至正戊子歲也先生幼穎悟拔出羣兒中甫三

四歲人口授以書輒成誦不忘稍長刻苦問學不以祁  
寒暑雨少懈父奇其志遣從石門陳公鏗翁游公之學  
得之於進士蕃遠祝公祝公得之玉峰車公上沂考亭  
蓋學之有源委者也於是益肆力於羣經百氏之籍尤  
精蔡氏書作爲文章精密雄健一主於理當元季有薦  
爲方岳者將浮海北上大父樂閒翁知時未可戒之曰  
適百里者當爲晴雨之計適千里者當爲寒暑之計適  
萬里者當爲死生之計汝獨不爲死生計耶其行遂尼  
日取聖賢微詞奧旨探索根底以爲眞知允蹈之本平  
居恆以矩矱自持言行無微弗謹事親至孝凡可以樂  
其耳目心志者靡不用情有疾則憂形於色食不下咽

衣不解帶不惟湯藥必親供而扶持澡洗亦未嘗輕委諸侍兒也服喪哀毀骨立斂葬一遵文公家禮伯兄原謙好學工詩先生事之如父恆以所學相師友不啻麗澤之相資其兄因以受益名其藏修之所遇宗族親舊俱篤於恩卹患難周匱乏植孤弱莫不悉力慮圖德之者甚眾鄉之暴悍多化其德是以雖當擾攘而閭里賴之以安初入國朝累徵秀才以母老不赴洪武二十三年始應樂清尹熊公之薦授樂清儒學訓導先生以敦本尚實爲教一趨乎正文藝則隨其材而課之無厭倦意成德達材彬彬輩出永樂改元考績銓曹陞伊王府紀善未幾以事少員多詔還家閒住因自號閒住老人

涵養益密從學之士四方雲集凡經造就卒爲名士作  
爲家譜自始遷祖而下數世人各爲傳令緒善行厯厯  
可考又繪其邱隴爲圖記之俾子孫世守弗失也初其  
師石門公愛先生之賢以孫女之後公被誣籍沒無後  
先生爲文招公之魂祠於家別館俾妻陳氏祀之終其  
身嘗預告祖考請遇以客禮此禮以義起也識者韙之  
永樂丁亥王之國於伊櫟起先生莅政先生竭力輔導  
知無不言罔避艱險敬撰治國要道十二章以進其目  
曰祖訓曰聖恩曰典章曰經史曰正心曰無逸曰知過  
曰納諫曰任賢曰去邪曰均愛曰立規情真辭切有足  
動人者王雖不悅其言亦以禮貌聽納歲庚寅又以事



力爭不已王深銜之欲坐以誅誤先生往訴於朝時名卿若王公淮胡公儼楊公士奇皆素知先生者深悼其不幸謀爲白之薦擢雲南提學官會皇上親征未果竟以疾終嗚呼惜哉享年六十有三詩文若干卷藏於家配陳氏先二年卒子男五人長玠次卽琪由鄉貢進士通判廣信府有能聲次琰次琢俱嫡出次琿庶出皆能以行義世其家女一人適士人樂清施順祖孫男五人孫女五人葬則卒之明年辛卯十月甲子也銘曰學之正行之純仁乎族悅乎親化殘暴安里鄰廓經筵充典墳爲文章著經綸推爲教善作人曳長裾爲蓋臣敷治道辭諄諄力諫諍致厥身運雖塞志亦伸國誓龜

時鳳麟吁已矣勒銘文千百載揚清芬

遺書

恕庵稿四卷

千頃堂書目作恕庵集赤城新志云有鈔本今佚

太平縣志稿凡四曰天台曰雲門曰金陵曰洛陽隨所

寓名之又與父有鄰

名德賢

兄受益

名仁謙

詩合爲一帙題

曰家學集

遺文

謝孝子傳序

赤城後集

曩余聞謝孝子名舊矣已而見父老談其孝行凡四端  
元至正間孝子客昌國奉母陳氏以居母病瘵孝子割  
股肉作糜以進輒差內附初孝子猶未去昌國也時蘭

秀山竊發海上蔓延昌國朝廷命殲之昌國人盡竄匿山谷間惟孝子侍母病不去官軍俘之以見其帥帥曰汝爲盜覘我耶何爲獨不去也孝子對曰母在子去將何之死則俱死耳帥義而釋之曰眞孝子也尋奉母還黃巖而留橐舊館人家越一年往取橐焉比至忽夢母盛飾坐堂上孝子曰俗占夢盛飾者死輒棄橐以歸母病若不能生者又一年母復病癱手足痿痺不自舉雖有他女奴可備養其眠食起居一出孝子扶持者凡一十三載余避席揖父老而言曰謝公之行信孝矣敢問四者孰難父老曰夢感於心誠則形形則著著則徵故周禮有六夢之占無難易也然剖股非軀命所關使不

避難而死之豈但一刲股哉故不避難難於刲股至若  
扶持眠食起居至十三載一出其力又難也蓋刲股不  
避難出於一時而勇於義者或能勉之難而易也其職  
扶持不怠非仁愛誠敬根於心而安於子職者能之乎  
易而難也嗟夫論其行雖若有難易究其心則亦隨遇  
而應烏可以難易評哉吾知孝子之心猶泉源焉隨地  
異勢或觸而鳴或坎而止或川而流無所不可故其刲  
股而疾愈者孝感於天也不避難而釋之者孝感於人  
也夢而足徵者孝形於心也其職扶持十三載者竭其  
力而純乎孝也余嘗語人曰知謝孝子者其惟父老乎  
今年秋孝子之孫乾出陸草屋所爲傳徵余文余讀之

其辭與父老大同小異余益信父老之談不誣矣傳書  
孝子以孝應召且授官而寵錫有加敕還祀其先竟發  
病卒而不得食孝之報惜哉孝子諱溫良字伯遜

聽松軒詩序

赤城後集

饒陽尹郭公去官之明年舍於椒山潘廷翰氏爲顏其  
軒曰聽松且爲之記台之士大夫又從而歌詠之皆鏗  
然韻金石若與松聲爭激昂者一日廷翰請篆其卷首  
作聽松二大字復徵序其後余曰耳之於聲莫如樂崑  
崙之竹嶧陽之桐泗濱之浮磬不叶之五音六律不足  
以韶夏子奚取於松哉君曰蕢桴土鼓純乎朴爾松之  
爲聲挾大塊之氣得元和之真含太古之餘音方其怒

而雄也若呂梁未鑿龍門未闢河流舂撞震撼天地育爲之失其勇夔襄爲之失其律天吳懼而龍伯爲之罷釣迨乎翕而合也若鳳凰之鳴朝陽惠不足以喻其和激而揚也若孤鶴之唳秋空夷不足以喻其清悠然而虛者與神謀飄然而迅者與氣協若夫變態萬狀至精至妙入乎耳而得之心不可以言喻故某之於是軒讀書恆於斯鼓琴恆於斯客至而飲飲而樂樂而歌以嘯亦莫不恆於斯咸若有和於側者人或以俗事告則曰余方與髯翁語子姑去余曰子蓋淡然忘世而自得於有聲之聲者矣子知無聲之聲乎禮云至樂無聲說苑云有聲之聲不過百里無聲之聲延及四海許由掛

瓢樹上厭其厯厯有聲遂去之其得無聲之妙者乎君曰至哉君之言也余曰未也君子善體物聞其言當會其理挺然正直者松也子其持德不回歲寒然後凋者松也子其秉心不變桓桓矯矯可以梁可以棟者松也子其博物洽聞豐其材毋若鳥獸好音之過耳邈然無與於已君曰命之矣於是乎書之請質諸郭饒陽以爲然否

雲松巢集序

樂清縣志

初余在樂清咨訪故老得瑤川朱先生希晦而惜其死矣先生當元季有詩名在士夫閒而行檢尤峻潔可重時秉使節下甌越者如僉憲宋公學士貢公皆願見儀

範以厲士風迨入國朝先生鬚髮皓白動合軌度幅巾  
短策徐行林壑望者以爲神仙中人郡邑始行鄉飲酒  
禮求齒德崇高名實相副足充大賓者而先生居首選  
余嘗廁翰林修撰趙君彥銘客席得見梅灣詩八首而  
楮尾自署姓名惟謹余愛誦再四不能去手因揚權於  
眾曰古人謂名下無虛士信然也而每欲見其諸子求  
先生全集以觀未能也閒嘗道經瑤奧瞻先生舊第在  
叢林閒而菟裘有曰永春庵者輒式焉永樂五年秋余  
自京師還龍鳴山中而先生之子幽袖出雲松巢詩集  
謁余言曰幽先子平生之志發於詠歌者盡在是編願  
序以垂諸遠余謂詩自三百篇以後惟唐爲盛唐人以



詩名者千餘家而李杜最著以故後世言詩者率以李杜爲大家數而宗之今觀是集其飄逸放曠者宗於李歟其典雅雄壯者宗於杜歟先生可謂善於學詩者矣惜余不得親見先生以談詩家利病而又慶其有子能守先生之家學也序而載名其上

遺詩

見赤城詩集三台文獻明詩綜方城遺獻三台詩錄共得詩十二首

回南京經古城

祠廟臨江渚人家雜棗林霜輕冬尙煖水闊晝多陰客路驚衰鬢歸舟愜素心從今各努力莫使別愁侵

人日

多謝東風力熙然滿眼春祇憐身是客又見日爲人冰

活水初動煙輕柳尙顰草堂嗟寂寞誰復贈詩頻

士未遇四首

月移階上花露滴階下樹四顧寂無人流螢自來去  
涉江采芙蓉江空曉雲溼脈脈無所言獨背西風立  
覽鏡當曉窗窗虛鏡光冷明知不如人羞見鏡中影  
畫虎不畫龍畫鳥不畫鳳恨煞丹青人雖工亦何用  
鐙下有迹

白頭紀善病艱難一點青鐙坐夜闌千里恐驚親骨肉  
緘書猶自報平安

秋江送別

野樹西風一雁秋江亭日落送行舟不知別恨深多少

明月蘆花水自流

憶故鄉

枯嶺東頭是故鄉  
碧天雲樹思茫茫  
甌江直與滄溟接  
不及羈人別恨長

雪隴

何處村南與村北  
風急歸鴉水雲黑  
漁家晚飯燒荻根  
門外雪花深一尺

草

露滴幽香不受塵  
東風吹綠上芳茵  
玉階生處無人識  
別是江南一片春

謁館頭忠烈侯祠

三台詩錄云侯以討王郢亂聞子規  
早啼兵誤戰死

橫春渡頭象浦西將軍戰死鼓聲低只今恨殺子規鳥  
飛過空山不敢啼

提學陳逸庵先生璫

子旅

赤城新志永樂六年戊子科陳璫臨海人已丑進士鄉  
試會試俱第一歷官翰林檢討與修五經四書性理大  
全終江西提學僉事今祀鄉賢祠所著有逸庵集

按江西通志

志作提學副使

大清一統志陳璫字廷嘉臨海人永樂中鄉會試皆第  
一殿試問禮樂刑政璫爲推原其本且極言靖難師起  
骨肉之間不無慚德誅戮黃子澄方孝孺等其如禮樂  
刑政何帝不之罪授庶吉士預修五經大全諸書乞休

薦起督學江西致仕

嘉靖浙江通志陳璫字廷嘉臨海人永樂九年進士改庶吉士授編修奉命纂修五經四書性理大全書成以疾乞歸十餘年足跡不入公府起廣西按察僉事提學日與諸生講學以見諸踐履爲先士皆振起甫三載乞休有梅浦田數頃減租以舒農力陳員韜與子選林一鶚皆出其門年八十二卒

雍正通志  
入儒林

台州府志陳璫字廷嘉號逸庵永樂戊子鄉試己丑會試皆第一辛卯殿試以禮樂刑政爲問璫對策云易曰上天下澤履君子以辨上下定民志是謂之禮又曰雷出地奮豫先王以作樂崇德是謂之樂刑者不祥之物

也以其除去不善以安夫善類故謂之祥刑政之爲言正也以其建六典道民於中故謂之善政此禮樂政刑皆在於陛下之一心也頃者陛下自燕邸入朝託疾不拜先臣黃觀言之此禮也卽樂也及靖難師起骨肉之間不無慚德其如禮樂何哉陛下嗣登大位黃子澄齊泰方孝孺等彼食人之祿與人之難夫亦自盡其心陛下旣處以極刑復戮及妻子其如政刑何哉臣愚以爲陛下今日躬禮樂刑政之任宜謹之於幽獨之地察之於隱微之中果天理耶期以充之果人欲耶期以克之天理明人欲消則禮不求備而自備樂不求和而自和刑不期清而自清政不期舉而自舉時執政見之驚歎

端士慮不測及進呈成祖覽之親批曰骨肉誤寫月字殊失不敬可列二甲授翰林庶吉士擢檢討尋奉敕纂修五經四書性理大全參考諸儒微辭奧義條入以補經傳總裁胡文穆公輩咸稱其有卓識未幾坐郎中盧信事繫獄值病大劇猶手不釋書久得釋辛丑以疾乞歸杜門十餘年足跡未嘗入公府時郡邑有用刑嚴峻者正辭以告遂易以寬鄉有訟不平咸造其廬以求決其見重於搢紳梓里類如此辛亥執政薦擢廣西按察司僉事尋改督學江西至則日與諸生講學務以見諸行事爲先闡明周子輪轅之說禁革淫祠甫三載遂乞休人服其勇退焉家居聞父福清教諭興祚疾宦邸卽

奔馳省視執喪哀毀骨立祭葬一於禮遇兄弟恩意曲至立白雲書院教授門徒講明理學侯通政潤與弟方伯臣陳方伯員韜與子選林郎中貴璧與猶子一鶚皆出其門所著有橋門聽雨集及逸庵等稿天順甲申詔進階朝列大夫成化改元乙酉卒於家年八十有二葬之夕有星隕其墓祀鄉賢嘉靖時御史周汝昌復請建特祠

按朱彝尊曝書亭集史館上總裁第四書辨燕王無來朝之事其言曰明太祖之崩在洪武三十一年五月遣詔諸王各於本國哭臨不必赴京是秋執周王橚廢爲庶人是冬齊王樽有罪召入京留之燕王方



慮禍及焉肯以次年來朝身犯危地而且傲慢無禮  
由皇道入登陞不拜致監察御史曾鳳韶戶部侍郎  
卓敬一劾王大不敬一請徙封南昌建文帝不報而  
燕世子及弟高煦適以三月至京師譬諸虎離其穴  
盡將虎子深入坎窞陷穽之中縛之一二獵夫力爾  
雖至愚者勿爲而謂智慮絕人之燕王爲之乎其言  
是也今逸庵殿試策亦誤信傳聞之說謂入朝不拜  
又以劾之者爲黃觀而非曾鳳韶則傳聞之異詞也  
此等語本非新進所宜言成祖不罪但摘小疵降爲  
二甲此足見君人之度矣

江西通志陳璉字廷嘉浙江臨海人永樂九年進士以

翰林檢討養疾家居起廣西提學僉事復除江西提學副使教諸生以講學爲務以見諸踐履爲先士皆振奮旋乞休歸

本萬厯南昌府志

按提學副使赤城新志作提學僉事墓志銘同未詳孰是

兩浙名賢錄陳璵字廷嘉台之臨海人起家進士選入翰林讀中祕書坐郎中盧信事繫獄邁劇疾弟琛入侍因感疾卒璵意極哀之而未嘗幾微怨盧時稱長者久之事白授檢討預修五經四書性理大全參攷漢唐以來儒先之說折衷之而一以濂洛諸儒爲準書成以疾乞歸就醫杜門卻埽者十五年方岳大臣咸禮於其廬

而鄉里有訟者不之官而求一言以爲解蓋雖投閒致散能以善成其俗如此正統丙辰聘同考會試事竣乞歸執政强起之擢廣西按察僉事提督學校纔五月而嶺南數千里風化一新丁外艱服除改江西江西士類素聞其風爭自磨濯以求見錄滿三載乞休致既抵家益謝絕人事惟以成就後學爲務家素貧而事母極甘胞母樂其養以壽考終而璲亦年踰七十矣晚年家益貧然急於行義嘗戒諸子遇貧乏者宜隨力賑之不必計其多寡若須富而後行恐吾儒終無濟人之期知縣孫振望嘗往謁璲顧其敝廬欲爲葺治且請令庖人繼肉璲皆峻卻之惟以毀淫祠除宿弊數事爲言曰使一

邑安則璫也受賜多矣成化改元進階朝列大夫明年卒春秋八十有二

右恬裕

又陳旅字正初台州臨海人父璫以詩經發解冠南省  
厯官翰林院檢討按察僉事提督江西廣西學政清節  
粹學師表一方旅承家學以明經舉爲江西新淦縣學  
訓導廉以律己公以率人鄉賢有死節爲人所諱者首  
題其名於碑以示勸暇則修治學官規益縣政上下交  
誦其賢擢翰林院孔目改國子學錄操履一如在新淦  
時雖無所事事而賢聲隱然出六館右遷監丞丞職雖  
卑而權則重監之紀綱自祭酒而下得參預焉旅乃首  
黜弊字遺財力清宿弊律已率人益嚴而厲監規爲之

肅然改南京國學六館之士素聞其清正望而畏之曰  
陳監丞來矣及署堂印遂奏請修飭廟學盡出羨餘以  
資公費一無所私輸粟生與外夷遣子入學者例皆厚  
贄旅一無所取顧於僚友生徒之孤貧患難者則傾橐  
周給之無吝色九載秩滿卽乞休諸生請於朝曰人師  
難得願再借留旅不待報翩然歸十載乃卒年八十有  
一 右清正

提學憲僉陳先生墓志銘

永新劉定之主靜撰  
赤城後集

昔者聖人作經垂世使後之士明其所載之道以篤諸  
行以達於政而又永其傳於徒類是以有天下者惟以  
經取士豈不賴其爲用若是哉然而能焉者罕矣夫惟

臨海陳先生其有以與於茲乎先生諱璣字廷嘉弱冠以詩經連魁浙江禮部試入翰林爲庶吉士檢討與修五經四書性理大全蓋時之習經者專攻偏曲摭摭浮冗以成篇章甚至剽誦陳言莫能自吐辭也先生雖主詩而他經羣籍出入該貫故發聞於藝場辭館甚蚤而傑出倫類其於道豈不明乎見之於行尤以孝友爲先歲除日聞父在任有疾卽奔馳數千里以往母疾晨夜視湯劑以祿養者數十年而侍庭闈之日多在宦途之時少母終年逾九十而先生亦年過七十矣而孺慕盡禮已爲長兄以率七弟其一人從歿於京寓旣歸葬其柩復遷窆於已所營墓側以已子煥爲之後其三人先

逝爲之撫孤畢婚嫁其三人與先生怡怡終老於林泉  
先生之行豈不篤乎自檢討歸里復赴召贊文衡任憲  
僉歷典廣西江右學政督勵士習懲抑吏饕詢察民隱  
罄其心力者三年以報政於朝而復致事以歸於是時  
去古禮大夫告老之期尙先十稔也有難進易退之風  
焉鄉俗葬尙浮屠婚較貲財正論以變之孤貧不能養  
疫疾不敢視推仁以濟之朝士嘗欲建言徵嶺海兵詣  
京輸作論以遠民宜卹台郡守治務嚴察闔境凜凜諷  
以政宜循良皆重先生從其言先生之政豈不達乎其  
所開發造就如先生本族有搏常聰稠豫相繼任臺察  
教王府師侯泮

按陳搏御史陳常教諭  
聰豫皆訓導稠未詳

他族有侯通政

潤與方伯臣兄弟也陳方伯員韜與御史選父子也林  
郎中貴璧與憲使一鶚叔姪也莫不執贄挾冊前趨後  
侍數其珠貫聯駢者若此他雖賢且顯不可悉數先生  
之經所傳又豈不永乎其官終僉憲而以恩例進階朝  
列大夫其壽八十有二所著有逸庵集若干卷其先自  
永嘉以宦來徙臨海曾大父貴實大父志靜父福清教  
諭興助

一作祚

皆有德善母虞安人配蔣氏繼室葉氏內

範世承子男四人旅賁

一作煥

睽旅翰林孔目煥鄉貢

進士未第而卒女三人徐夔洪堯周一清其壻也一清  
今爲慶遠府知府子與壻皆受教於先生者也孫男十  
四人憲寧密察寅寵雋逮守宙寂完穹宥女三人其壻



阮讜程白王璠旅聞訃將歸葬先生於其鄉梅浦嶼坑山之原以先生門人翰林檢討侯丕所述狀來請銘銘曰

魯叟教人必興於詩庭訓厥子首先於茲聖遠儒陋膚淺鮮知惟陳先生深造遐追亦篤於行不但浮辭白華之孝樂養期頤棠當作常棣之愛脊令鳴飛死也我求生

也我依考槃之歌隱處孔宜泮水之教浙埂江湄海北嶺南萬徒千師陶英鑄俊受我成規先生歸矣其教不衰今其沒矣文塚巋巍金緋在幽遺經在笥嗟爾後覺尙繫爾思豈惟子孫克念紹之

按赤城新志薦舉陳興祚字惟昌臨海人永樂閒本

府訓導尋陞福清教諭致仕家居教誨不倦子璫爲翰林檢討又景泰四年癸酉科陳煥臨海人檢討璫之子

遺書

逸庵集

赤城新志云今其家有刻板按集凡三卷今佚久矣

逸庵陳先生文集序

崑山葉盛與中撰

赤城後集

余以使事過江西者再矣往往聞諸大夫道其前督學王陳兩先生之賢其言曰前有王先生文教用興後有陳先生士罔或不承先生往矣吾何以觀吾之成言已有欲見而不可得之歎邇來南中維舟江潯而新淦知縣夏璣以陳先生文集一編來蓋先生之子縣庠訓導

旅所編而璣爲之校正而刻焉者也嗚呼文昉於經者  
聖賢治道所寓欲因之以立教也孔子聖賢之極治教  
之宗其於經刪之述之勤亦至矣其心以爲苟不得行  
斯道以施澤於一時則必明斯道以救弊於萬世蓋生  
民無窮而治教亦無窮者聖賢之心也自是以來言之  
者不可謂之不多亦孰不曰吾所師者經吾所願學者  
孔子卒之求其關世教而裨治道其有得於聖賢之心  
者幾何人哉此吾於陳先生之文蓋不能無感焉先生  
天台右族蚤有文名以毛氏詩取進士高第官翰林賢  
稱卓然正統閒會稽王孟堅先生在江西按察司專理  
學政以介特不合上官自引去繼之者難其人廷議卽

以先生往先生謂其俗尙素文告以古人輪轅之說曰  
與諸生從事惟以窮經講學見諸行事爲先於是晦者  
明柔者強風教爲之益振居三年而先生亦以年至謝  
事去矣今之居館閣踐臺省布列中外知秉公迪廉下  
造民福上以翊贊聖明無前之治者先生之及門子弟  
多在焉先生雖臥病於家而乘輶擁節懷刺詣廬達官  
貴人相踵接然則先生之文特其餘事文固不足以盡  
先生也蓋先生天稟淳篤風采凝峻宜其文確乎而莫  
之撓先生文學淵懿才藻煥發宜其文浩乎而莫之窮  
先生所施教與弟子之所則效皆有用之學非無益之  
爲宜其文如穀粟之必可療飢如布帛之必可卒歲如

藥石之必可伐病而睨彼離經背道譁世冒名汙人紙  
與筆而不免爲塵土之歸者可同日語耶文總爲一集  
凡三卷僭爲書之卷端如此使得之者知先生之文出  
於經且知先生以身爲教之有補於治而亦知有所感  
發焉王先生無與是編而及之者先生之同道亦江西  
士大夫之意也

遺文

臨海縣儒學題名記

赤城後集

臨海令李侯治邑旣三載政通人和百廢具興而廟學  
規制煥然一新上下觀瞻者莫不稱歎以爲能侯復念  
鄉貢未有題名無以示勸將來乃命工礲石自國朝肇

科以來凡與選者皆得鑱其氏名仍虛下方以俟後之繼進者而請余言弁其首侯之篤意校庠如此其奚辭遂爲之言曰科目之設雖倣於隋唐而歷代因之不廢而其科試之法則未有如我朝之善者也先之四書五經以觀其性理之明次之論判詔誥策問以稽其斷制識見之卓固非尙乎文詞而已也且三年大比預名鄉貢而後合試於禮部中禮部試者而後策對大廷賜進士及第出身有差此又成周取士之遺意也是故上而謨謀廟堂下而庶位所以建勲業而垂聲光於不朽者胥此焉出雖以吾之一邑而由此以揚芳邁偉者亦項背相望則得人之盛豈非以其法之善歟然而賜進士

者既立石題名於太學則鄉貢進士題名於學者亦宜也前令屢欲興舉而未遑而侯一旦力爲之其亦可謂能也已繼自今庠校之士必將黽勉不已期以登名於斯石又必將指之而曰某也端學術以慎名節在吾所當法某也隳行檢以壞學術在吾所當戒益思所以切磋其問學砥礪其操行則斯石之樹豈曰小補之哉此則李侯之深意也諸君子盍相與勉旃侯名文序湖南京山人由科目發身故其爲政知所當務如此云

軒井記 赤城後集

台郡東去四舍許有驛曰朱家奧在桐巖山之巔地少居人無井泉而日用水則汲於山之麓下上危峻負荷

惟艱以故往來其閒者無所取水而夏暑人多病渴然  
有一源出於其上則汙穢而不可食今鎮守浙江副都  
御史軒公輓按節至台道經其地乃曰駟舍使客所必  
由而水則人不可無駟置山巔而取水於山麓何不便  
如之遂命以其源之所污者渫而去之有頃水輒泚然  
以清掬而飲之厥味甘美公曰是豈不可以爲井耶由  
是命驛丞劉稻白於臨海令李文序因達之於今掌郡  
事浙藩右參政周旭鑑於是各捐俸鳩材而命工築其  
旁甃之以石覆其上構之以亭行者莫不嘖嘖稱歎曰  
此軒大夫之井也而感其德者不釋諸口監察御史星  
源程昞希大蒞台聞而遽之謂不可無以示久遠旣大



書軒井二字以揭於亭之楣乃屬余識其事將鑱貞珉以垂不朽惟公由進士授行人司副用薦拜監察御史嘗奉命清理戎籍浙江持之以清嚴而行之以寬恕迄今人德之不已及超擢按察使又克以激揚爲己任而貪墨者不敢肆其姦今陞憲臺鎮守浙江適盜起金處勢甚猖獗而列郡兵民咸有所賴而不恐且先後浙江亡慮十餘年而其清介絕倫始終如一日則其德澤之感於人者奚啻一井而已哉昔邵伯循行南國以布文王之政或舍甘棠之下後人懷其德而不忘至覩甘棠而戒以勿翦勿伐然則台人覩井而感於公者豈非猶南人之感於甘棠矣乎故吾爲之說曰南國之人非愛

甘棠也思召伯之德也吾台之人亦非感乎井也感公之德也德之在人者不可忘故人之思而感之者隨所見而不能忘爾因併書之使知台人之所懷感於公者不徒在此也是爲記

台城八詠詩序 三台文獻

台城八詠者余友陳君好禮之所倡也好禮家世業儒其先大父南齋先生以碩德宿學貳教臨海邑庠君居重慶之下固已得於濡染之餘又嘗與余同師事靖庵趙先生而承其指授之妙故其學邃而深少嘗有志世用泊父喪母老遂銷聲塵市中而以歌詠自娛其於可喜可愕可翫者皆於詩焉發之或當天和景媚則與二

三同志尋幽訪古以暢敘厥懷旣又以凡天下名邦皆拔其山川之秀麗者爲八景以詠之惟吾台寥寂無聞因采撫郡志以其槩釐爲八景而作詩以爲之倡由是吾邦之士雖隱顯殊科而工於詩者莫不抽思出奇以賡和焉予得而觀之大篇鏗金石小篇鳴絲竹其所以狀山川之清致者殆無餘蘊矣好禮不鄙謂余當有言以弁其端余惟自有宇宙以來卽有此山川雖有奇絕之狀亦自古而已然但其擅名稱於天下者或因人而顯或以文而著稽之史傳蓋可知也吾台山川甲於浙東自晉孫綽唐任蕃之賦詠已顯名於四方及宋南遷以來逮於國朝名公鉅卿由茲出者項背相望則吾台

山川又若增而高且深矣今又得諸君子爲之賦詠以播揚之使一披覽之頃而郡城秀麗絕特之狀宛然如在目前而傳誦稱賞之不異於方丈蓬瀛焉則吾徒之產於台者豈不益有光邪雖然吾台人也但願吾台之士相與淬礪出焉而才德以彰處焉而操行以立俾山川因我而益重毋使我因山川而重也

淇園詩序

三台文獻

吾邑之東不百里而近有地曰陽屏董氏代居之其先在趙宋閒有諱朴者官至戶部侍郎而季諱楷者復爲提刑故其族爲吾邑望而子姪多事詩書崇禮讓其字士恭者則又其翹楚者也性嗜清澹雅愛竹嘗垣其居

傍隙地爲園四周皆植以竹培護之久而美盛堅密望者恍然如目接乎淇水之上也因以淇名園而鄉人之欽其德者或因以目之邑之縉紳士與之游契者多爲之歌詠長篇短章亦旣錫金石而鏘絲竹矣不鄙於余而介姻戚王君彥深徵言弁首簡余惟天下之好尙雖萬有不齊而莫不惟其德之似苟非其所似焉則雖其聲色足以娛耳目臭味足以悅鼻口亦莫之好也是故山不過一土石之塊耳而厚重不遷者獨好之水不過一淵泉之溢耳而周流無滯者獨好之非以似其德乎他若元亮之愛菊茂叔之愛蓮和靖之愛梅又非以其德之似乎夫惟以似其德也故雖終日翫之而不厭沒

齒樂之而不忘也若士恭之好竹而植之成園至以淇  
名之而見重於縉紳間者又非有貴於其德乎今夫竹  
之爲物其中之虛也有所受其外之直也無所屈挺拔  
於霜雪之表春容於風雨之間殆若端人正士靜虛動  
直屹立於存亡危迫之秋而不少渝其操行者寧不爲  
清修之士所慕乎不然則天下之物可狎可翫可好可  
樂者亦多矣何士恭獨規規於是邪抑吾觀衛人之美  
武公而託興於淇竹也始焉旣以其猗猗然者述其學  
問進修之益中焉又以其菁菁然者美其德之尊嚴終  
焉又以其如簣者贊其德之成就然則士恭之園之竹  
豈無所謂猗然菁然而如簣者邪苟能愛於竹而求無

媿於竹之德焉雖曰無武公之封爵而鄉人士之慕其德而覩其竹者又豈無衛人之託興而播諸詩歌者乎斯時也雖不有請吾更當爲士恭序之士恭尙勸之哉

文通王節齋先生一寧

浙江通志文苑王一寧仙居人英敏過於常兒年十三能詩仁宗在東宮聞之召試早過銀河詩立奏中永樂癸未會試尋丁父憂家居十年會宣宗求文士甚切吏部以應召見試表正萬邦論及詩賦皆見嘉賞擢吏部主事改翰林修撰預修宣廟實錄充進講官主考應天鄉試歷遷禮部左侍郎卒贈太子太保諡文通一寧爲人閭敏疏達爲文必根於理詩詞翰墨清絕可愛

本分省人

考物

台州府志王一寧名康以字行號節齋父峻用字宗濟  
洪武間進士累官國子監丞永樂二年使高麗比還饋  
金珠裘馬卻勿受四年成祖幸學賜衣一襲以軍務如  
山東改調北監初峻用總六館時一寧侍焉年十二琴  
書詩翰皆絕人獻陵在東宮聞之召試稱旨遣肄國學  
十八領應天鄉薦登李麒榜進士授工部主事莅湘湖  
廉介自持以文名召對見知尋轉吏部稽勲司主事薦  
入內閣輔太子改翰林修撰陞經筵侍講正統改元兼  
修宣廟實錄兩主南北京闈鄉試一典會試進禮部右  
侍郎督餉湖廣時苗蠻蠢動運道不通一寧擘畫有方



不勞而餉足回部轉左侍郎兼學士召入閣辦事進太子少師一寧厯事四朝賞賜優渥襟度坦夷休休有古大臣風卒贈太子太保禮部尙書諡文通事載一統志有集二十卷門人李夢陽爲之序子顯文淵閣中書舍人同修玉牒兼翰林院侍書宇南京中城兵馬終知府春翰林院檢討

按明史宰輔表景泰二年辛未王一寧禮部侍郎兼學士十二月入三年壬申四月晉太子少師七月卒又懷獻太子見濟傳邸王卽位欲以見濟代太子先賜大學士陳循高穀百金侍郎江淵王一寧蕭鎡學士商輅半之用以緘其口景泰三年四月更封太子

爲沂王立見濟爲太子又加賜陳循高穀江淵王一  
寧蕭鎡商輅各黃金五十兩而尙書都御史不預焉  
卽此觀之可知內閣之重矣

兩浙名賢錄王一寧仙居人父俊用以鄉貢官國子監  
丞寧隨父居京年十三已能詩仁宗在東宮聞之召試  
早過銀河詩立書七言絕句以進深見嘉賞十八以詩  
經中京闈鄉試又四年戊戌舉李騏榜進士尋以外艱  
歸家居十年始至京師會宣廟求文士甚切吏部以寧  
應召見試表正萬邦論及詩賦皆當上心擢吏部主事  
俾與大學士陳山等共事於文華殿未幾改任翰林修  
撰與修宣廟實錄書成進侍講以母喪歸服闋充進講

官尋遷禮部右侍郎奉敕往湖廣督運糧餉隨軍進剿  
苗賊措置有方軍興不乏景泰二年被召還京理部事  
遷左侍郎晉通議大夫無何以疾卒訃聞賜賻楮萬緡  
遣禮部官諭祭贈太子太保禮部尙書諡文通命有司  
歸其喪并爲營葬域一寧爲人闔敏而疏達爲文必根  
於理詩詞翰墨清絕可愛孝友忠信之行尤爲人所稱  
卒年僅五十有六有才而見於用不旣世其惜之望  
光緒仙居志王一寧名康以字行號節齋宋朝奉大夫  
若九世孫父峻用字宗濟洪武十八年進士累官國子  
監丞永樂二年擇才節大臣可使高麗者廷臣交薦之  
錫狐裘繡服往高麗王郊迎比還餽金珠裘馬卻勿受

四年成祖幸學賜衣一襲以軍務如山東事竣改調北  
監初峻用總六館時一寧侍焉年十二琴書詩翰皆造  
其妙仁宗在東宮聞而召之試詩稱旨賜金綺遣肄國  
學十八領應天鄉薦登戊戌李騏榜進士授工部主事  
莅事湘湖廉介自持宣宗求文學詞翰之士有司以名  
聞召見命賦神京八景及嘉禾詩善之尋轉吏部稽勳  
司主事以母老疏乞歸養不允改翰林修撰侍經筵正  
統改元兼修宣廟實錄擢禮部右侍郎督餉湖廣時苗  
蠻蠢動運道不通一寧擘畫有方民不勞而餉足回部  
轉左侍郎景泰二年十二月與祭酒蕭鎡同兼翰林院  
學士直文淵閣贊機務三年四月晉太子少師時景帝

欲易儲先賜大學士陳循高穀百金侍郎江淵蕭鎡及  
一寧學士商輅半之用以緘其口五月立子見濟爲太  
子又加賜內閣陳循及一寧等各黃金五十兩是年七  
月一寧卒贈太子太保禮部尙書諡文通有集二十卷  
門人李夢陽爲之序一寧厯事四朝主會試一主鄉試  
二詩文秀雅襟度坦夷獎成後進惟恐不及休休焉有  
古大臣風子顯字廷榮號誠齋文淵閣中書舍人同修  
玉牒兼翰林院侍書字字廷寬號緝齋南京中城兵馬  
司終知府春恩授翰林院檢討

雜錄

和禮部王侍郎一寧留別濬縣魏少尹之作

鄭文康  
平橋集

肺肺垂楊渺渺河平川驛裏暫經過白頭天使鄉情好  
青眼仙郎舊話多候吏幾人沙上立新詩八句酒邊哦  
知君共有蒼生念細說民艱奈晚何

王一寧學士哀輓

于謙

忠肅公集

內相方承寵渥深那堪鵬鳥集承塵文章功業成千古  
臺閣絲綸少一人慷慨誰論天下事淒涼空憶夢中身  
向時談笑皆陳迹惟有臨風淚滿巾

遺書

王文通公集二十卷

見千頃堂書目焦竑國史經籍志  
作文通集八卷今佚

節齋文集三十六卷

見千頃堂書目今佚按門人李夢  
陽爲序

遺文

三首見三台文獻又六首見仙居縣志不悉錄

江湖勝覽記

目之接於物者皆覽也江湖之上商賈之往來仕宦之驅馳皆謂之勝覽可乎余曰賈者以利仕者以名爲利爲名皆不得謂之勝也無所求於外而獨有得於心者是之謂勝然亦有覽之而無所得者焉彼覽之而無所得者見夫山之高水之大而爲之駭目喪魄且不暇又孰知其爲勝哉若夫學固乎內而心欲求通行修於家而識有未廣必有待於見聞以益之如是而遠游觸於目者足以開其心胸聞於耳者足以廣其知識充充然有得然後謂之勝覽也新安詹輝彥文者積學於家有年矣聞天下山川之大京都之麗城郭之堅皆不可以

名言者今吾如坐井中所見者井中之天耳其天之所  
以爲大地之所以爲廣皆不可得而知也有志乎四方  
而未遂時其外舅程公爲副都御史彥文乃攜書戒裝  
省之出嚴陵挹釣臺之清風下錢塘覽東吳之壯麗登  
姑蘇之臺歷北固之山浮江渡淮遡呂梁之嶮望鄒嶧  
之秀由是道平原亂衛河遨遊京師則天下之所以爲  
壯爲麗者一覽而盡得之高者足以發其卑大者足以  
發其隘麗者足以發其質然後見之於言行發之爲文  
辭皆非向日守廬者比此彥文之學所以有進也此所  
以爲勝覽也余與都憲程公有同年之舊又喜彥文之  
學於是行而益進遂爲記其勝之大者知其所得者亦



大也

按此篇無甚發明以文獻所載姑錄之

盤谷推篷圖記

梅之爲物著於書詠於詩者以實弗以花也至於屈大夫賦離騷謂其多識於草木之名而獨不及於梅是並其實與花而遺之矣何古之人嗜好有弗同歟下追中古韻士逸人始盛玩其花而遺其實非反古之好蓋亦有所取也稱其實者言其用而玩其花者尙其節也當草木搖落之後羣陰始剝之時能消息天地之理得雷復之先氣巋然於荒山窮谷不爭妍競麗於名園勝圃其色瑩潔芳鮮其香遠而益清其標緇塵不污疏瘦而有韻其操禦攘冰雪而不畏蓋有君子之風焉所以取

而好之宜矣盤谷去臨海東五十里錢君士治世居焉  
谷多紅梅花盛開時山麓水涯望之迷遠近臘雪未消  
斜月將墜君艤小舟梅所推篷流視久之乃已如是者  
不知幾此往矣旣節推新安縻於官守一別向十餘載  
而往來于懷不能已政暇告其守從吉從吉善寫梅者  
遂彷彿其篷中所見之景爲圖以遺之披玩之頃而盤  
谷幽勝一覽而盡得之報政赴京徵余爲記古人之  
於梅有巡簷索笑或攜一童一鶴踏雪以賞未聞有駕  
舟雪後推篷以觀者也其爲好孰甚焉昔何遜在揚州  
廨舍有梅日吟詠其下後居洛思之不已因請再任比  
抵揚而花正開終日徬徨樹下千載以爲美談今君之

於盤谷又桑梓之所當恭敬者也其爲思之尤宜他日引年歸谷構三休亭於溪干必徬徨其下不知與遂之興誠爲何如也君爲新安有節操以清白著聲遠邇人謂其有得於梅固有以夫是又不得不錄之也

游白雲觀詩序

聖天子嗣大寶位五載於茲海宇清晏民物康阜聖心惓惓以爲春陽發舒民生有或未遂三月一日下明詔布德音霑仁澤於天下羣臣萬姓四夷八蠻莫不熙熙然歡欣拜舞於闕下以爲千載之嘉遇也前期德受約游白雲觀至是朝退廷振諸君輒欣然騎從先行獨余與廷贊後出宣武門度橋沿流西行五六里更深巷稍

折以北平原。廡廡環以古城。繚以周垣。曰栖霞福地者。是也。重門邃宇。廊廡廓然。西有屋數十楹。尤甚幽邃。爲玄素倪師所居。徑往造之。而諸君已在坐矣。師灑落喜客。嘗有一日之雅。出迓甚歡。旣飲。以佳茗乃從容周歷觀中。三殿翼翼。其最後者云長春真人於此尸解也。殿北有閣。倪師所成者。翬飛輪奐。高可踰數尋。引二梯始得至其上。凡都城之麗。西山之秀。鄉野之曠。時物之妍。皆歷歷可見。西闕草亭有道士制鍊其下。眾樂趨之道士亦欣欣留坐。龐眉白髮。神完氣充。若有所得者。四壁蕭然。唯杖屨而已。時日及午。德受曰。行廚酒肴具矣。復延至師。所以敘就坐。酒數行。師出奕以樂客。奕者四人。

皆不以勝負爲意亦可以見吾徒之用心也旣而師亦爲具酒行無算一二童子歌青天詞侑之眾皆歡甚醉焉壁閒有山水小景類武陵源者立爲賦其上賦畢或曰去觀西二百武有浮圖極宏麗可一往以罄餘興廷振曰吾樂不在彼也又曰今日文游不有所述無以紀其勝於是人賦二詩遺師詩成予惟諸君子日侍禁祕紉金匱石室之書以校讎編摩爲職業疲神弊思恆以不得豁其心目發其壅滯爲慊幸而屬茲休暇聖天子賜曠蕩之恩得聚首以窮一日之樂夫豈偶哉其爲樂也不假絲竹之音不窮山水之幽不放浪形骸以爲達不側弁屢舞以爲適樂時物之得所暢情志於觴詠尙

祥以往休休焉以歸以成君子之樂宜也是作也其發  
乎情而止乎禮義者歟同游者九人侍講劉君廷振編  
修蕭君孟勤吳君與儉賴君德受江君時用檢討李君  
克述庶吉士王君廷贊邂逅而至者刑部主事蕭君維  
禎其一予一寧也詩凡十六首撫觀中景物之勝析而  
爲題裂紙而探之予得爲敘不獲辭而僭敘諸首

遺詩

見三台文獻

九日游神樂觀分韻得然字

束帶事柔翰苦茲世務牽良辰入奇懷逸興何飄然聯  
鑣眾君子來訪琳宮仙空原散游目虛室祛煩喧丹鑪  
淪新茗行廚羅廣筵采菊泛清觴焚香調素弦鬱懷旣

夷曠佳句多所宣懷哉龍山飲百世猶當傳

題山水圖

幽人事溪居溪清水亭小蘿徑長新苔深林閒叢篠往  
術斷欲迷紆迴忽深窈洲闊漁歌遠地偏游樂少開簾  
納遠山忘機狎鷗鳥水氣晚生涼溪虛月逾皎我本山  
水人閒情抗塵表載酒棹孤舟何時共幽討

題湘江煙雨竹卷

三湘遠出湖湘南沙明水碧多寒潭江上亂山竹如簣  
連朝煙雨成陰嵐扁舟曾艤江之滸莽莽綠雲渺何許  
煙梢雨歇茂林開猶帶輕陰隔前浦湘君悵望楚天低  
九疑又在衡陽西欲從洞庭尋九疑兩岸鷓鴣竹上嘯

聞之倚竹遙相待不覺年華倏云改餘情空付水東流  
枝上還留淚痕在鳳池有仙清且才胸中成竹何奇哉  
令人看畫憶往事彷彿推篷湘水隈

淮陰遠樹送侯進士還台

歸路經淮楚微茫夏木連桑村飛鳥外柳驛夕陽邊密  
密藏深雨陰陰宿煖煙登高無限趣暫駐木蘭船

送孔大尹友諒還雙流

春城微雨浥輕埃列宿纔從報政回楊柳可堪燕市折  
桃花還向錦江開愁聽巫峽猿聲去正及巴川雪水來  
想是甘棠多暇日新詩取次綠陰裁

賦桃源雨牧送王員外弟歸會稽



孤帆帶雨下官河歸路遙從牧野過負郭人家煙火溼  
連天秋色笛聲多推篷宛有桃林景扣角應無白石歌  
故國萼鱸今正美不須淮北羨煙蓑

山水圖二首

懸流下紫煙橫橋臥晴碧日色入林遲當晝林霏溼  
山下陰雲晝不開一溪新漲浸樓臺由來地僻無行迹  
惟有疏松覆綠苔

台學統卷七十三

台學統卷七十四

黃巖王 蔡輯

吳興劉承幹校

詞章之學二十一

侍郎杜樂全先生寧

赤城新志永樂二十一年癸卯科杜寧天台人丁未馬  
愉榜進士及第歷翰林編修侍講南京兵部左侍郎調  
福建左參政有樂全集藏於家

浙江通志名臣杜寧天台人宣德丁未進士第二歷翰  
林修撰侍講遷南京兵部侍郎土木之變寧與于忠肅  
謙建議請郕王監國社稷賴以復安者寧與有力焉居

官清介人不敢犯

本舊通志按府志云杜寧字宗謐宣德丁未第一甲第二人工文詞所著

有樂全集邑志云崇祀鄉賢餘同通志

按明史本紀但云皇太后命郕王監國不言出自于謙等之請卽于謙傳亦但言郕王監國命羣臣議戰守侍講徐瑄言當南遷謙厲聲折之守議乃定並不言監國出自謙之請也惟本紀言八月辛酉次土木被圍壬戌師潰帝北狩甲子京師聞敗羣臣聚哭於朝侍講徐瑄請南遷兵部侍郎于謙不可乙丑皇太后命郕王監國則監國在議戰守之後與謙本傳抵牾或由謙與杜寧之請亦未可知然社稷賴以復安者實由力闢南遷之說而不在乎郕王之監國也

遺書

樂全集

見千頃堂書目浙江通志今佚

天台志稿

見浙江通志今佚

遺文

寧海縣學重修大成殿記

台州府志

古者聖人繼天立極其道備於六經而爲萬世帝王治天下之法者則孔子刪述之功也有天下者舍斯道則無以爲治猶工師舍規矩則不能成室也秦不師古燔滅六籍奮其私智爲治不旋踵而亡漢興高帝過魯以太牢祀孔子知所本矣孝文求遺書孝武表章六籍教化覃于海宇卒縣四百之祀惜雜以黃老使純用聖人

之道其效蓋何如也哉自是世主相承莫不知尊孔子修其廟祀然天下未有也唐開元閒尊以王爵郡邑始有廟通祀焉宋慶厯初詔天下立學而濂洛諸儒相繼挺出南渡來朱子又集諸儒之大成而折衷之六經之旨燦然大著我明誕受天命奄有四海干戈甫定聿崇儒術遐陬僻壤莫不有學育才取士皆本朱子之法治教之盛超軼漢唐寧海縣學大成殿歲久圯壞幾廢督學劉公謁廟歎息之旣而致白金七十餘兩及太守阮公所致命縣丞潘珍董其役於是市材鳩工役始於成化己丑四月落成於庚寅二月殿凡五閒高敞宏麗輝煥靜深逾於舊觀旣而知縣孔睢至乃與訓導舒旌詣

余請記寧海故文獻之鄉也號稱多士邇年爲令者率以期會爲急務尠知教化之重學宮敝陋風雨不庇以墜教基曾不及佛老之徒克壯其居豈端本澄源之意哉夫政之廢舉存乎人俗之汙隆由乎政今得賢部使與良二千石捐俸新學以誘進之諸生將感激自勵日刮月磨講學以明禮制行以修身培其根本端其趨操務歸於實踐他日賢才輩出見諸事業書之簡冊垂於無窮庶幾無負國家設學造士之意抑亦憲副太守二公之所望也二公皆發身進士劉公鈺安城人阮公勤交南人並記之

余氏祠堂記

赤城後集

黃巖有余氏望族也其裔曰廷信富而好禮嘗倣子朱子於正寢之東作祠堂以奉其先歲時率族人子弟行事唯謹廷信且歿其嗣子從嘉克承父志徵余言爲記刻於麗牲之石以告來者夫萬物本乎天人本乎祖聖人制爲宗廟祭祀之禮所以示報本反始不忘其所自出也宗廟天子七諸侯五大夫三適士二官師一庶人祭於寢雖有尊卑降殺之殊而其致一耳子朱子以家廟非命士不得爲之於是勑爲祠堂之制使貴賤皆祭自高祖至禰四世蓋四世服盡服盡則祧斟酌古今之宜足爲後世之常法矣廷信倣而爲之非知禮之本能如是乎夫所貴於故族者以能敦孝弟秉禮義猶有前

人之遺風而異乎流俗也苟徒恃其閥閱之舊而不知  
尊祖親親之道報本反始之心侈其室廬而寢薦乎祖  
厚於自奉而儉乎籩豆則亦流俗而已矣又曷故族之  
足貴哉廷信爲宋孝子元卿之裔代有宦業多知名士  
恆以禮治其家庭信早孤克自樹立讀書飭行勤儉治  
生貲益饒事母以孝聞撫弟妹恩意周洽仁卹宗族字  
孤葬死無有遠近要皆本乎尊祖親親之所推者可謂  
爲人之所不能爲出乎流俗之表無愧故族者矣傳曰  
一家仁一國興仁一家讓一國興讓焉知鄉之人不有  
觀感興起者皆知尊其祖親其親祠祀由禮而弗苟俗  
可美化可成也豈徒余氏子孫之所守也哉是不可以



不記故爲之書云

毅庵賈先生墓志銘 赤城後集 不錄

遺詩

瑞應龍馬歌

三台詩錄節去十八句今從三台文獻

龍媒古今天下稀歛見呈祥出西陲聖主仁恩被遐邇  
一朝效貢來彤墀天閑十二總奇比睹此咸驚羣辟易  
稟氣本是房星精素文帶得冰霜質雙瞳夾鏡照夜明  
四蹄琢玉追風輕紅纓錦韉黃金勒闔闔出入驂龍駢  
靈姿駿格迥無比謾數纖離與騄駼奮跡寧須伯樂顧  
瑞時自致天顏喜御苑春深花正香驕嘶蹀躞過長楊  
足底渾疑駕雲霧道傍頗覺生輝光神物由來不伏櫪

會思盡展平生力千年長侍瑤階前萬國永使風煙息  
憶昔榮水龍負圖洪猷始闡人文敷吾皇至德撫嘉運  
重臻上瑞真同符小臣快睹騰歡呼再拜稽首歌唐虞  
元夕觀鐙詩

鳳城春早辟餘寒雪霽雲收月正圓錦繡筵前呈萬舞  
金蓮花下集千官光移銀漢天逾近漏滴銅壺夜未闌  
願祝皇圖磐石固年年長侍聖君看

題鶴睡圖

玉斚玄裳絕點埃月明曾共舞仙臺一聲喚醒朝元夢  
滿地松陰鎖綠苔

主事章約齋先生陬

浙江通志文苑章陬字仲寅黃巖人領鄉薦試春官俱  
第二歷武庫主事武庫主百司廉從或得其奇羸以自  
潤陬獨斂退羸馬陋室如曩昔遇古今書會意處輒手  
錄之退爲其從游者剖析無倦累典鄉會文衡稱得士  
景泰己亥命同修宋元史續朱子綱目卒所著有書經  
提要詩文集

本台州府志按景泰無己亥當作乙亥

黃巖縣志章陬字仲寅號約齋店頭人幼穎悟日誦數  
千言未冠領鄉薦第二益肆力於學後試春官亦第二  
授禮部主事以疾告歸少孤事其伯父猶父撫誨其諸  
弟尤篤起爲武庫主事武庫掌百司廉從或得操奇羸  
以自潤陬恬靜斂退羸馬陋宅如曩昔遇古今書會意

處輒手錄之退爲從游者剖析無倦累典鄉會試稱得  
士景泰乙亥奉命同修宋元史續朱子綱目一夕歸自  
史館暴卒劉學士定之表其墓著有書經提要約齋橐  
從祀鄉賢祠

兵部主事章君墓銘

永新劉定之主靜撰

赤城後集

君諱陬字仲寅姓章氏世居台郡黃巖曾大父國材不  
仕大父曰孜國初舉明經試禮部主事父子良以君貴  
贈兵部主事母鄭繼母戴皆贈安人君幼穎悟日誦數  
千言以書經學領浙江鄉薦名在第二時猶未冠也主  
司爲加冠於藩省之堂歌鹿鳴以命醺按宣德己酉先  
生年二十一而  
猶未冠者殆冊年稍減故未冠以實之歟歸家益肆力於學又數年始上春

官

正統元年進士

今少傅冢宰王公少保學士陳公較其文名

又在第二廷試亦高等授禮部主客主事未幾以疾請假歸里君早孤事其伯父若父撫誨其諸弟尤篤未仕鄉俊秀多執經問難既歸藥物有閒日從事於敬順友愛授業解惑以故其弟唐舉於鄉得乙榜今爲長汀教諭鄉後進亦多發聞大率君力也鄰藩江右聯科聘君典文衡取舍公明眾論諧愜於是君居家歲久矣蕭然林下無復榮進念而士大夫多謂君材猷方嚮用不宜投置閒散屬今上登極遂起君爲兵部武庫主事武庫掌百司僉從其多寡異數貧富異地得以視時勢爲背向或操其奇贏以自入以故居焉者志甚得人亦多向

慕之君獨恬寂斂退羸馬陋宅如曩昔遇古今書會意  
處解頤肯首快讀急詠若恐不及公退爲其從游者章  
剖句析削稿正誤無倦色景泰甲戌同考會試得士彌  
眾明年上命儒臣修宋元史續朱子綱目君被薦與其  
事一夕歸自史館猶然炬閱書久之乃寢中夜卒時十  
月二十一日也距其生永樂己丑正月八日得年四十  
有七君別號約齋配任氏封安人子男三人奎晃紀女  
一人在室孫男一卜以卒之明年葬黃輿山嗚呼君可  
謂篤學清修君子也已余始赴春官與君相遇於廣陵  
兩舟銜尾行朝夕會言揭曉聯名敘交漸篤泊君三爲  
試官而余仲弟長子相次出榜下以門生禮拜君益可

謂有世契矣冕以春坊清紀鮑君廷贊所述事狀來請  
銘誼不獲辭乃序而銘曰

已乎約齋亦既逢時聲實相符政學兼施其所短者不  
享耄耆以大其用鏗錙赫熹豈不有後遺經載笥蓄而  
發之尙其在茲

雜紀

三台詩錄約齋屢司文衡稱得人教授生徒剖析不倦  
樂清章恭毅公綸既成名猶走黃巖從學所著書經提  
要分天文地理圖書律呂四門已見蔡傳者不復出天  
順閒門人任騏跋

遺書

書經提要四卷

見明史藝文志經義攷云未見浙江采  
集遺書總錄有錢塘吳玉屏瓶花齋寫

本

四庫全書總目是編以天文地理圖書律呂四者皆釋  
經之要故分爲四類每類又各分細目繫以圖說自序  
謂見於蔡傳者不複出然其圖皆從諸書采錄其說亦  
多襲取陳言無所考辨召誥土中說一條引周禮日東  
則景夕多風日西則景朝多陰謂蔡傳所引王氏之說  
誤爲景朝多陽景夕多陰今按蔡傳祇以多風誤爲多  
陽未嘗誤爲景夕多陰或陬所見與今刊本不同耶  
書經提要序

聖人定書所以紀帝王之治也上明天道下述人事旁



敘萬物罔不畢具其經世之大典乎自燔於秦火緝於漢儒雖遺經僅存而大義隱矣迨宋九峰先生承考亭指授而爲之傳然後聖人微詞奧旨煥然復彰於世其有功於後學卓乎不可尙已抑聞韓子有曰記事者必提其要若天文地理圖書律呂四者皆是經之要也然天文之度數或未易析地理之沿革或有不同至於圖書律呂先儒固有成說而散見他書未有萃於一者故學經之士得其一或遺其二愚竊病焉輒不自揆用摭先儒之說爲書四篇名以提要或爲之圖或述其義閒以一得之愚附焉其具於蔡傳者不復復出庶幾其說簡明易見不假他求而得其要矣因錄而藏之以備觀

覽非敢僭爲著述也同志之士幸訂正焉正統甲子二月既望賜進士禮部主事台郡章陬序

跋書經提要卷後

右書經提要一帙迺春官章先師之所著述也先師爲浙東斯文之宗自少克志於學而尤篤踐履甫弱冠以是經兩魁多士尋拜官容臺厯政未幾而綽著冰檠之聲適以疾賜告家居四方之士鼓篋而相從者旁午爲歸麒麟以葭莩之好亦叨竊先師膏馥講授際嘗謂麒麟以爲士之力學貴乎知要若天文地理圖書律呂皆是經之要而不可以不明焉時拜觀先師於是四者或爲之圖或引成說或著己意粲如日星誠學經者之權輿是

以忘其蕪陋而濫竽編輯之責迨書成先師被命之京  
調官武部更歲茂選入館閣纂修而麒幸由茲奔尺寸  
之祿未遑鉞梓以傳嗚呼今師已矣是書猶存不敢自  
寶謹捐俸命工鉞梓以廣其傳雖然先師之文固不待  
是而顯學經之士則必因是而益明也耶謹跋時天順  
四年龍集庚辰月正初吉直隸太平府當塗縣儒學教  
諭門人任麒拜識

同治辛未余從錢馨伯侍御

桂森

假翰林院所藏書

經提要一部凡四篇五十五葉序目三葉屬門下士

青田章式典

楷

相與其錄副本以歸將校訂而壽之

梓是歲四月下弦臥虎山人王榮識於宣南雲居寓

室時漏已四下矣是月癸未鐙右草草校一過棗又  
記

約齋稿 赤城新志云有鈔本今佚

遺文

雲松巢集序 樂清縣志

雲松巢集者樂清朱先生希晦所賦詠也先生家瑤川  
世有令德自幼嗜學勵行有志於古人元季遭海內亂  
遂囊括不仕益閉戶讀書以究其業下筆才思泉湧而  
詩尤工故因物寄情傷時感事凡有觸於外而動於中  
一於歌焉發之日增月積多至千餘篇扁其室曰雲松  
巢而稿因以名焉自先生歿迄今五六十年而瑰詞藻

句往往傳誦於世余每見而竊歎之以未獲覩其全集  
爲恨正統庚申其元孫美從余讀書空明山中閒嘗捧  
先生遺藁示余請爲之序余發而視之但見其思致精  
深詞意豐贍滔滔汨汨如驚濤怒瀾蛟鼉出沒而可駭  
可愕要其所至多有得於唐人大方家之心法而無雕  
琢委靡之氣故沈潛反復累日不厭焉嘗因是推之先  
生以有爲之才不幸生於季世故形於言者澹然無求  
於時而怡然有安貧樂道之志往往自放於山巔水涯  
以寄其興而模寫雲林泉石之幽以及草木昆蟲之變  
雖所寓不同而皆曲盡其妙至於閔時病俗婉詞諷刺  
又有得於風騷之遺意焉故玩其詞想其人而知先生

之不遇爲可歎也使其生於明時而出其所有以鳴國  
家之盛豈不偉哉雖然先生之志固不獲自見於世而  
其可以傳世垂後者未必不在乎是矧其諸孫咸有志  
於繼述而美方以俊乂選爲郡庠生異時業成名就以  
昭先生之德者尙有待也若然則是集之傳將彌久而  
彌彰矣奚待序而顯哉然美之請甚勤有不容於終默  
者因書以歸之

東湖紀興唱和詩序

赤城後集

景泰紀元之春吾邑應君志和爲郡庠司訓講學之餘  
偕諸僚友出游東郭時歲序聿新風日暄暢俯視東湖  
凝冰初解新波漲綠草木向榮沙禽游泳物性各自適

焉君於顧視之頃觸諸外而感於中因賦近體詩一章以紀之同游之士暨詞林之善鳴者咸屬和焉連篇累什葩藻交映傳之當世皆足以膾炙人口未幾君以內艱去服闋赴天官出是集屬余序余惟詩所以言志也志之所之言必形焉今觀是詩可以知君之志矣君世爲黃巖儒族蚤承家學而篤於好古閉關讀易深得義文微旨以復名齋期以踐履爲事雅尚沖靜盤旋邱壑有會意處一於詩焉發之視榮利漠然不以綴意其志之素定者如此故當時名臣交章薦之皆辭不起卒以郡守周公薦勉就郡庠而君猶以好爵之自縻不若林泉之容與也故茲感歲月之更新品物之自適慨然有

碧山之想因以形諸詠歌其志之所存也遠矣視彼汲汲於勢利以得失爲欣戚者果何如哉宜乎一時縉紳士咸高其志而賡歌之成集也雖然易不云乎時止則止時行則行蓋君子之道隨時屈伸初無容心於其間也君以老成之學任師儒之寄向也教施鄉郡臻於成效矣茲調蘭陽又將推而大之使成德達才之士彬彬輩出則吾道之澤所被者遠由是偕升要秩以宏厥施庶足究其蘊爾尙俟引年之期言旋舊隱釣游東湖上以追曩日登臨之樂亦豈晚乎余忝姻鄰知君也深用是序諸篇端庶幾觀者知其志之所寓因以爲君勉焉

按三台文獻卷十五有汪先生傳題章陬撰今攷約



齋卒於景泰乙亥而汪傳敘事稱成化丁酉在約齋  
卒後二十三年則此傳決非章作也故不錄

遺詩 一首

委羽洞 三台文獻

蠟屐閒探古洞門奉林遺跡喜猶存靜搜方石穿雲竇  
細閱殘碑拂蘚痕覓勝祇疑經白鹿尋真那復向桃源  
故人亦有登臨興杖策相過共討論

附台州府志章陂游委羽山詩

遲日嬉游古洞門昔人曾此駕雲軒欲尋方石緣風磴  
細閱殘碑拂蘚痕世上不知空歲月就中疑是別乾坤  
五符靈寶何時授悵對斜陽誰與言

三台詩錄云此詩見三台文獻與郡志所載止第四

句相同不知何故

按郡志詩後四句太  
泛疑文獻改之也

教諭應復庵先生志和

從父祥

子紀

赤城新志薦舉應志和太平人博學能詩正統閒授本  
府訓導改河南蘭陽終番陽教諭今蘭陽有生祠所著  
有復軒稿

黃巖縣志孝友應志和名律以字行號復庵鏡川人家  
故多貲而從伯尚武貧無子志和以貲歸其兄而身爲  
尚武後無何尚武卒伯母周年老在堂竭力事之無異  
所生自幼篤志問學博涉能詩從叔父尚履游比長登  
葉拙訥之門亟相推許永嘉黃文簡淮一見遂定爲忘

年交由是聲譽日起南畿提學孫鼎薦爲鹽城訓導以  
母老辭正統中州守復以郡學薦乃迎母就職已丁母  
憂服闋改蘭陽陞鄱陽教諭蘭陽人生祠之在鄱陽雅  
志風教尋引疾歸考德問業者門無虛席年八十四卒  
著有復庵存彙祀太平鄉賢祠

葉良佩七先生傳應鄱陽先生名律字志和以字行號  
復庵溪南先生從子也父尙惠

名渭

徙居吾里家故多貲

從伯尙武貧且無子禮宜先生嗣父沒伯兄志卿領其  
家先生則子身出嗣尙武未幾尙武死伯母周年老在  
堂先生事之無異所生顧先生家雖貧而篤志問學嘗  
從溪南及拙訥游皆亟相推許永嘉黃文簡公一見遂

定爲忘年交由是聲譽日起遠近交辟南畿提學孫公鼎薦爲鹽城訓導以母老辭周郡守旭鑑復以郡學薦始迎母同赴官無何丁母憂服闋改蘭陽蘭素乏科第又其僚酗酒而愎先生結以恩禮久之媿居士服其教科第亦班班出任滿陞鄱陽教諭蘭陽之人相與立生祠祀焉其在鄱陽尤篤意風教未及引年遽乞休致號宜休居士年八十有四卒所著有復庵彙應氏雜錄又應溪南先生名祥字尙履黃巖人宋名儒仁仲之後自幼卽屹然有巨志讀書攻苦永樂閒嘗爲邑庠生已而棄去構溪南書屋於澧川之上左圖右書肆力冥搜發爲文章抑揚開闔隨意所至要其歸一本於禮詩尤

勁麗古雅先生誨人隨其所業剖析精微弗明弗措生平數困於疾然未嘗以疾而廢業也卒年五十有六余家有先生存橐門人張學錄粹敘之曰文貞先生集文貞者門人私諡也

又應黟縣先生諱紀字茂修宜休翁之季子也以治易領浙江鄉薦試禮部得乙榜署六合教諭時宜休翁家食先生分俸爲祿養乃諸生贄禮及歲時饋節物一無所受顧復捐已貲贖贍貧乏用是六合士民翕然尊信之舉攝縣事且半載有能聲頃之聘爲福建考試官所取皆知名士遭父喪守制滿改黟縣清修如六合未幾遂謝病歸號繼休居士既歸而家故貧甚嘗授徒余家

以自給實余之養蒙師也所著有玉山慚橐兄紹維經  
皆爲鄉塾師又皆高年先生事之極恭歲時幅巾杖屨  
遨遊山谷間龐眉皓首里人咸誇爲盛事云

浙江通志文苑應宗祥字尙履黃巖人少好學讀書達  
旦懸髻屏牀以自警爲諸生未久卽棄去構書屋於澧  
川之上詩文好古不自貶以趨世弟子私謚曰文貞

朝詩集

本列

黃巖縣志應宗祥字尙履號溪南大澧人恕之後少好  
學讀書達旦懸髻屏牀以自警爲諸生未久卽棄去構  
溪南書屋於澧川之上自號兼山山人詩文好古不自  
貶以趨世嘗與修郡邑志卒年五十六弟子私謚曰文

貞張學錄粹其門人也黃少保淮志其墓

太平縣志應紀字茂修號繼休志和子成化庚午舉人  
會試乙榜授六合教諭以歲俸供宜休翁家食身自刻  
苦於饋遺一無所受孳孳勉諸生問學士民翕然尊信  
舉攝縣事半載平反冤獄有能聲頃之聘爲福建考試  
官所取皆博雅之士父喪歸滿制政黜縣清修如六合  
未幾亦謝病家貧授徒自給有田數畝門下遣力代之  
耕歲時幅巾杖屨與伯兄紹號賓月仲兄維號訥齋叔  
兄經號冰淡遨遊山谷閒皆龐眉皓首隱居爲鄉塾師  
見者起敬稱爲林下仙會袁通判文紀來掌縣事袁六  
合人素重之乃盡蠲其族人之徭俾以直歸繼休繼休

辭不取令族人建宗祠

兼山人應君墓志銘

永嘉黃淮宗豫撰

介庵集

墓志銘

赤城後集題作文貞先生應君

余謝病歸田未久也鄰邑逢掖之士應君尙履蔡君元  
元介樂成曾敬來謁余喜有得朋之樂促席劇談應君  
答問若建瓴蔡君亦彬彬雅飭款留數日別去正統戊  
午春應君攜從子志和門人盧爵復來惠訪適余屏處  
山庵泛舟徑造挾族譜徵余序留三宿而夙疾作蹙爾  
言歸疾稍閒馳書抵余論作記之法余擬答未發也而  
君之訃至矣嗚呼痛哉天何奪吾良友若是之速也元  
元之子駟亦君之門人偕盧爵奉君從兄教授諤所述



行狀來請銘其墓義不可辭於是反袂拭淚次第其事而銘諸幽君諱宗祥尙履其字也天資穎異幼卽屹然有巨志其讀書積學也卷涉目輒成誦以故學博而彊記年未及紀鼓吻學吟時作驚人語鄉長老如伯真徐公大昌余公皆優禮獎掖稱爲小友稍長從明師辨質淬礪恆以古道自期夜誦率至四鼓疑有未釋遂達旦不寐或苦其睡魔則懸髻牀屏以示警父母憂其夙抱羸疾禁止之稍輟而復讀自壯至老益肆力冥搜發爲文章抑揚開闔隨意所至要其歸一本於理詩尤勁麗古雅不自貶以趨世好其處已應務也宅心夷曠制行峻潔紛華貨利淡無所營麤衣糲食裕如也家貧親老

設帳授徒以供修隨父耄耄服食臥起身任其勞遇宗族篤於義先世田廬讓而弗較與人交傾心吐膽不設町畦亦不阿意苟容善則稱揚過則規諷卽有所拂逆未嘗有變色識鑒尤精確人之臧否得喪舉不能遁其情其出處大節也永樂閒嘗從邑庠諸生游而厭爲科場文至有南轅北轍之相戾於是拂袖而歸構溪南書屋於澧川山上號兼山山人以見志遠近負笈而至者日益眾隨其所業剖析精微弗明弗措暇則危坐一室左圖右史薰鑪茗盃悠然自得客至款語終日率關平世教而和氣充溢可挹名門大族設行窩延致亦忻然赴之貴流雅士過其里多來就見邑之賢大夫嘗遇以

賓師之禮屬修郡邑志延就筆削懇懇致力禮部郎中  
孫原貞親臨程督尤加敬愛朋舊在顯位者薦剡交至  
俱以疾辭語人曰吾非薄功名而不爲也吾命內所安  
寧捨己以徇人耶好游覽名山勝境追訪古人遺跡閒  
道一抵金陵後再游錢塘皆有紀行之集生平數困於  
疾未嘗以疾廢業己未冬十一月病作呼諸子謂曰吾  
病殆不能支然未可戚吾父吾瞑目後若等當竭力致  
養庶可少紓終天之憾詰旦族姻故舊咸來候安否起  
擁衾坐口占一律以謝音節意趣不異平昔諸弟子鳴  
咽出涕諭曰生寄死歸茲理之常幸自勉以圖樹立哀  
傷無益也反席未安而卒若翁親臨哭之慟聞者莫不

悲慘是月之望也歷年僅五十有六羣弟子痛念其師  
學弗究其施相與稽諸輿論士有易名著於禮經略倣  
貞曜故事私諡曰文貞昭厥志也君之係序出自晉觀  
陽烈侯詹宋初曰宗翰者由永康徙居黃巖三傳至武  
仕至大諫侍講緝熙殿卒贈少師又五傳至諱泰亨者  
君之高祖也曾祖諱肖翁元黃巖州學正祖諱虔紹興  
蘭亭書院山長知元將亡謝事還家父濟賓隱居自佚  
年八十五壽考康強未艾也母王氏早亡配同邑大澧  
潘氏善理內政亦先卒子男三闡闡嫡出周庶出卒之  
明年十月十二日葬於白浦山之原銘曰

玉蘊於璞兮其光燁如匪雕匪琢兮完質以歸養弗克

終兮數不可違令名永垂兮人孰與俱溪南之山兮龍  
虎趨安此吉壤兮慶有餘大書深刻兮慰我遐思靈或  
感舊兮寧不一瞬而嗟咨

按誌先生非仁仲之後葉海峰集黃巖縣志皆誤也  
鄱陽教諭應先生墓碣銘

黃巖謝鐸鳴治撰 桃溪翁

鄱陽先生復庵應公既卒之明年其子教諭紀以余太  
守叔父書介其所親繆君思敬狀屬金君鳳魁來請銘  
時余在南都方蒙恩東歸未暇也既歸教諭君以起復  
北上遇諸途復拜余泣請不已於乎余尙忍銘先生哉  
曩余謝病家居得從先生杖履者幾十年既而以史事  
赴召別先生鏡川上先生酌之以酒而贈以詩所以屬

望之者不淺余旣落落無成方仰首故山藉先生以終  
老而先生沒矣前輩老成典刑無幾余又安得不爲先  
生銘哉先生諱律字志和以字行仕終鄱陽教諭復庵  
其別號也應氏世爲黃巖望族至先生之父息耕翁尙  
惠始遷邑南之鏡川今分隸太平矣黃巖之應實始永  
康在宋有緝熙殿侍講在元有上饒山長玉泉在國朝  
有全歸先生尙節溪南先生尙履按察副使志欽行業  
文章後先輝映蓋先生之諸祖諸父昆弟也先生穎悟  
夙成未束髮時已能屬對作驚人語稍長從溪南學旣  
又獲登拙訥葉先生之門拙訥以學行重一時亟相推  
許永嘉黃文簡公三朝元老一見至與爲忘年交於是

聲譽日起遠近交辟南畿提學孫侍御鼎薦爲鹽城訓導以母老不果行周郡守旭鑑復以郡學薦乃始迎母以養未幾丁母憂服闋改河南蘭陽蘭陽素乏科第且其僚酗酒而愎先生相處以禮而結以恩久之不覺愧屈於是士服其教而科第亦班班然矣暨其去也蘭陽之人相與立生祠焉其在鄱陽尤篤意風教訪周瑜陶侃之墓而封表之進江萬里彭汝礪於祠而尸祝之賢聲之著上徹淮府方期大用而先生力乞休致矣時去引年尙遠大夫士莫不惜其去而高之旣歸更號宜休居士奉先教子老而不倦考德問業門無虛席暇則幅巾杖藜寓情詩酒如是者蓋幾二十年而卒年八十有

四實宏治戊申十有二月十日也配安人林氏有內行  
先八年卒子男四紹維經紀類能讀父書而紀方馳聲  
宦途先生之澤未艾也女一適涇輿陳暢孫男若干輅  
縣學生曾孫男若干先生重厚樂易雖與人無忤而未  
嘗詭隨雖望之儼然若不可褻而無賢不肖皆得其懽  
心雖博學能文而恬於進取不事舉子業雖晚歲勉從  
祿仕以出然科目勢所偏重而薦舉顧爲具文故一時  
輩行去先生遠甚而位遇反或過之至有方岳重臣往  
往出於其門者而先生終老一甕不亦重可念哉用慨  
所見以銘墓上之碣以告於世之欲知先生者銘曰  
棟梁斧柯涖江河孰抗不撓障此頽波於乎先生勢



如之何死者可作我銘不磨

遺書

溪南稿

應祥撰見浙江通志

赤城新志溪南稿應尙履著有鈔本

復庵存稿

應志和著見浙江通志

赤城新志復庵稿應志和著今其家有鈔本

太平縣志復庵存稿明應教諭志和著謝文肅稱其詩  
溫雅深粹視世之盤摺麤硬務爲奇崛頽墮潰爛而漫  
無精采者大不侔嘗聞牧牛詞東湖紀興諸作膾炙人  
口今皆不見豈世所謂大好者乃先生所大不得意者  
耶

讀復庵存稿

謝鐸撰

桃溪淨稿

曩余嘗續編赤城詩集邇自永樂以迄於今亡慮五六  
十人而其卓然可傳者則又不過數人而已若復庵先  
生應公益其一也於乎詩之傳其亦甚難矣哉先生之  
詩溫雅深粹類其爲人其視世之盤摺麤硬務爲奇崛  
頽墮潰爛而漫無精采者大不侔矣此稿實先生之子  
紀教諭君所編合古律絕句凡若干首余少時嘗聞先  
生牧牛詞東湖紀興諸作往往膾炙人口而今皆不復  
見豈世之所謂大好者乃先生之所大不得意耶不然  
先生自入仕以至歸老後先幾四五十年其感時觸物  
發而爲詩者何限而何其存什一於千百若是其寥寥

耶先生詩學遠有端緒族祖梅魂詩嘗爲虞邵庵諸公所稱賞季父溪南翁則又永嘉黃文簡公之所推重者也先生雖蚤有譽於詩及其再薦而起未老而休靜退之操蓋尤有先民長者之遺風焉然則先生之所可傳者又獨以其詩也哉教諭君世篤家學而益思所以光大於其後應氏詩書之澤君子於是乎知其不可涯矣通守袁公政治之暇乃獨首訪先生之詩將刊之以傳亦有見於此聞其風而興起者乎先生名律字志和復庵其別號也世爲台之黃巖人正統中以經明行修起家爲台州府學訓導累官鄱陽教諭致仕以歸幾二十年年八十有四而卒今祀鄉賢祠

赤城叢錄十三卷

台州外書應志和編采錄唐宋來郡人詩及他郡人詩之有關桑梓者其書傳錄已不全而篇目具在亦見當時采綴之勤

太平縣志志和嘗輯赤城叢錄皆唐宋來詩今惟見首卷目錄

應溪南遺詩

四首

見黃少保淮三首

列朝詩集

盛世天所助生此王佐才道德著明效國本益以培四海永寧謐豈曰資涓埃向來諸國老論功乃其魁從容萬幾暇師保日講陪宇宙百年內禮樂何盛哉台雁本

鄰壤草木同昭回聞風起歎慕誰甘臥蒿萊

天道有常運成功詎無已誰能參化機履盛貴知止筮  
仕得明君千載同魚水擎天力已任取日功可擬道德  
重師保恩榮兼父子眷委日方隆引年何遽爾介石有  
明訓動息存至理東南釣游地清風播蘭芷

空山有畸人家世業詩書齒髮日益衰所得僅緒餘好  
古不自量臨文每嗟吁漢道日以降作者稱歐蘇名公  
閒世英壯歲游石渠吐論補殘經節轅戒虛車饒夫過  
屠門大嚼意方舒斯言可以喻我行勿玄且

重游吳山

三台文獻

吳山風景不禁秋此日登臨憶舊游蠟屐重尋楓葉路

畫船曾繫藕花洲  
胥濤拍岸空遺恨  
宋社成墟總是愁  
千古林逋高節在  
可堪無酒醉荒邱

應復庵遺詩

錄四首

東西清蔡君尙則

三台文獻下同

老眼長如醉逢君忽自醒  
獨爲松菊主不媿草堂靈  
繞郭山如畫當門檜作屏  
地偏人到少孤咏許誰聽

述懷

住近天台是我家  
白頭猶自滯天涯  
日斜倦鳥還空谷  
春暖閒鷗浴淺沙  
疏廣有金供客具  
陶潛無酒向人賒  
何當歸問尋真路  
溪上碧桃都是花

三月六日出鄱江

鄱江江水夜來生乘興相攜載酒行芳草連天春欲暮  
落花滿地雨初晴近人白鳥忘機事到眼青山不世情  
唱和何妨歸去晚東風淡蕩片帆輕

書畫船爲黃少保賦

方城遺獻

濟川功就賦歸田適意南湖書畫船  
綳帙卷舒芸葉亂冰綃點染墨花鮮  
清高不啻居天祿幽雅渾疑在輞川  
漫說風流同米老儼然瀛海一神仙

應復庵遺文

林郎中行狀別見

王節婦傳

赤城後集

王節婦章名某黃巖人宋郇國公得象十六世孫女祖  
曰孜禮部主事父子盛不仕荆府伴讀陽夏官主事陞

安福校官唐其兄及從昆弟也節婦自幼秀慧莊重父  
母愛之年十八擇所歸遂妻同里王欽彥恭王亦邑著  
姓彥恭明敏好讀書節婦事舅姑相夫咸有其道家事  
無巨細身任之使彥恭得專志於學宣德乙卯以書經  
領鄉薦名大著正統己未會試辭教職入胄監至壬戌  
中進士科尋以疾卒於京師時節婦年二十有八男一  
女一俱幼計至節婦哀痛迫切不知所爲欲以死殉之  
所親語之曰養老字孤將誰託耶遂強起脫簪珥謀所  
以歸其夫葬之每哭之慟慟必頓絕而甦明年舅歿哀  
戚甚至治喪葬惟謹養姑益篤甘脆輕煖之具必適姑  
意人有憫其孤嫠者風再適節婦輒叱之曰我未亡人



耳所以不卽死者爲老親弱子故也若等以吾爲貪生  
忘義者乎狗彘之行吾不爲也欲自殺其姑諭止之子  
稍長延師教之嘗誨之曰世之孤子失教不知自樹者  
多矣汝宜自力於學或怠荒忝所生且貽吾羞尙可以  
爲人乎其子卒以善稱於鄉女一適太平士族葉澄卿  
節婦孀居餘三十年冰檠之操如一日今年滿六十康  
寧暇逸諸孫濟濟家道益裕豈非天之寶節義祐貞淑  
以厚風化乎故余因葉澄卿之請遂爲傳其事使觀民  
風者有所考云

贊曰人謂節婦少爲儒家女長爲儒家婦詩書之澤沾  
被之深其見義明持已正卒以貞節自勵宜也於乎允

若茲則名爲儒者當何如哉吾見名非其實行不掩言者多矣若節婦者豈惟世之爲人妻者宜是則倣而爲丈夫子者又可不求無媿於節婦哉

按王欽父玩初子淞孫啟成化丁未進士仕至刑部侍郎

布政蔡霞山先生潮

浙江通志循吏蔡潮號霞山臨海人宏治乙丑進士選庶吉士改兵科給事中歷遷貴州右參議時清平苗寇據香鑪山以叛圍城數重潮誓死以守間道轉餉士皆奮勇先登剋日勦平自鎮遠距省城凡七程重岡複嶺旅行數十里無所依止潮爲十里一亭翼然相望行

人賴之轉福建參政督糧儲悉心籌畫軍糈給而兵民不擾山路崎嶇乃相地險隘輒爲梁亭如萬里林鹽田溪北嶺飛鸞雲嶺一帶悉爲康莊轉河南右布政以兩河盜賊充斥令郡縣道周悉種榆柳俾木植成行不惟賊騎難於出沒且蒸薪亦資民用未幾乞休歸睦族卹鄰凡道路津梁圯壞者捐貲修葺如平大惡灘建邵家渡橋移三江埠疏泉井洋凡可以利物濟人者爲之無遺力卒年八十三

本分省人物考

臨海縣志蔡潮字巨源號霞山宏治辛酉鄉魁乙丑會魁選庶常正德丁卯改兵科給事中戊辰分考禮闈所拔多名士在諫垣慷慨敢言中外想望風采適逆瑾當

事建議閱驗天下府庫虛實遣言官中貴人雜出意在  
擊搏漁利公奉擇詣閩務惜元氣存大體閩人懷德庚  
午轉右給事中辛未遷湖廣按察司僉事提督學政力  
振士習校閱精嚴湖湘人文振起乙亥轉貴州右參議  
時清平苗寇據香鑪山以叛勢搖全省公至鎮遠賊猖  
獗圍城數重公誓死以守閒道轉餉士皆奮勇先登竟  
賴蕩平自鎮遠距省城凡七程重岡複嶺崎嶇險絕旅  
行數十里無所依止公每十里爲之棚亭翼然相望嘉  
靖壬午轉福建右參政督糧儲悉心籌畫軍糈給而民  
兵不擾泉漳二郡樹碑以表其功閩山路崎嶇相地險  
隘輒爲梁亭如萬里林鹽田溪北嶺飛鸞雲嶺一帶薈

蔚悉爲康莊丁亥轉河南右藩時兩河盜賊充斥令郡縣道周悉種榆柳俾木植成行不惟賊騎難於出沒且薪蒸亦資民用汴人賴焉未幾具疏乞休撫按交留疏凡五上乃得請旣歸徜徉山水吟咏終日好讀書手未嘗一日釋卷性孝友睦族卹鄰親戚故舊以匱乏告者靡弗周襟度宏曠不立城府凡道路津梁圯壞者捐貲修葺如平大惡灘建邵家渡橋移三江埠疏泉井洋凡可以利物濟人者爲之無遺力懸車二十餘年如一日也歲中每值旱潦輒持齋率鄉耆詣神祠祈禱靡不應已酉夏旱禱祠冒暑致疾卒年八十有三所著有霞山集今祀鄉賢子雲程另有傳

按己酉嘉靖二十八年也公生於成化三年丁亥其  
乞休在嘉靖八年己丑時年才六十三耳越二十年  
乃終

兩浙名賢錄德業蔡潮臨海人弱冠業詩更業春秋浩  
博精詣於書無所不窺宏治乙丑進士選翰林庶吉士  
改兵科給事中慷慨敢言中外想望風采遷湖廣按察  
司僉事督學湖湘轉貴州右參議貴西南荒徼蠻獠藪  
叢兵革相尋時清平苗寇據香鑪山以叛勢搖全省潮  
毅然躬詣鎮遠扼吭擣虛竟底蕩平自鎮遠至省城七  
百餘里重岡複嶺崎嶇險阻行旅無所息肩乃爲之十  
里一亭翼然相望迄今庇蔭不衰轉福建右參政督理

糧儲悉心擘畫軍給而民不勞泉漳二郡樹碑以表其  
功他如萬里林鹽田溪飛鸞嶺諸地皆魑魅魍魎之窟  
潮相其險隘輒爲梁涂蔽以亭宇遂爲康逵轉河南右  
布政使道出建陽時朝天橋燬於火舟渡多沈溺公私  
爲病民聞潮過號泣遮留願復橋以濟潮側然弭節驛  
亭解衣爲唱聞者爭助之卽日掄工授成算視舊有加  
落成而後去人擬之端明萬安云及莅汴凡注厝悉務  
寬平與民休息時兩河盜賊充斥令郡縣道周悉植榆  
柳縱橫各以行列賊騎難於出沒而民亦賴其蔭蒸未  
幾具疏乞休五上始得允旣歸徜徉山水陶寫吟詠道  
然樂以終日不事家人產而振貧周急終身無倦色凡

有便於人者必盡心力爲之自筮仕以至蓋棺四十餘  
年如一日也卒年八十有三潮性孝友好讀書未嘗一  
日釋卷爲詩文肆筆而成求者靡弗應短章片簡率寓  
箴戒不爲無益語所著編次名言二卷判義六卷對偶  
菁華一卷藏於家

右略改節

明河南右布政使霞山先生蔡公墓志銘

金黃亨所集

一

吾師霞山先生蔡公考終之明年爲嘉靖庚戌其孤亨  
之始得地於灘溪龍華之岡祇謀窀穸事云知先君無  
如吾子墓閒之石將惟子屬焉黃亨謝弗勝固讓於名  
筆亨之列舉以告几筵已乃偕其季以狀帛來拜且泣  
曰卜協於靈矣子奚辭黃亨泣拜受狀辭其帛於乎我



公愛我沒而不忘如此哉公諱潮字巨源別號霞山其先鄞人五世祖與三徙家臨海高祖仲賢曾祖明善祖廷貴隱德不仕父永昇號貽庵仕閩滄峽大使贈兵科給事中母杜氏贈孺人公自少穎異不羣蚤失怙恃孤苦自持嗜學若飢渴通毛詩春秋二經督學吳公伯通趙公寬擢冠庠彥期以大用宏治辛酉以春秋魁兩浙乙丑成進士選入翰林丁卯除兵科給事中戊辰同試事於禮闈所拔多名士時逆瑾用事建議遣言官及中貴人雜出閱視各藩帑藏意在攫利肥己公詣闕獨持公法存大體同事者莫敢如何閩人感悅庚午轉右給事中明年陞湖廣按察僉事奉璽書督理學政嚴條教

先行後文甄別不爽毫髮士大悅服旣久相與稱賢督學必曰霞山夫子云乙亥轉貴州右參議時以清平苗寇據香鑪山往鎮其地賊勢猖獗圍城不解遠邇震驚公晝夜拊循軍士激以大義誓死守城閒道餽糧而飢卒濟顓天濬泉而古井出於是人心益奮卒殲巨寇而蕩平之太宰唐公龍時以御史按滇適覩其事乃破格論薦至以張許守睢陽爲比其士民肖像立祠歲時爭進俎豆後亨之督滇學參政貴藩每過其地則相率遮道問公起居稽首稱謝曰若翁實生我也自鎮遠抵會城道遠險巇行人倦無所息政暇爲之十里一亭亭必有井至今過者憩亭酌水頌德而行會奉詔市木川貴

閒部院敘勞以聞受文綺白金之賜嘉靖壬午轉福建督儲參政至則運方略足兵餉勵卒伍以禦海寇漳泉底寧剏修各郡橋梁底以亭宇闢萬里林鑿鹽田溪設北嶺飛鸞雲嶺敷化諸關岑蔚屏剏奪息行人如在康莊且經畫有道民不知勞四明豐學士熙爲之記與漳泉兵民所勒大事石並顯於閩至今觀者若墮淚碑云丁亥轉河南右布政使道出建陽有橋跨悍流而壞民遮留以病涉告公惻然弭節解衣爲倡垂成而後行旣抵汴汴曠衍多盜令廣植榆柳縱橫成列由是盜不得肆而薪蒸用需幕僚有死而不能歸者爲之措畫及捐俸金以相其行公自貴閩以來久抱歸志至是疏凡五

上浩不可遏撫按交剡乞留則已飄然天姥之巔靈山之麓矣急流而退人以爲難居閒逾二十年波及鄉井振貧卹孤散醫藥助斂葬不倦凡通道要津無舟梁者刵之廢者舉之壞者新之捐貲刵義人多悅從其尤難爲力者如大平大惡灘邵家渡架以修梁移三江埠頭疏東泉三井除千百年之患於一旦而貽之以永利久安蓋逸人而忘其勞裕人而不自知其不足也歲旱必禱禱必應己酉夏亢暘爲甚仍齋素出宿不避炎暑因而致疾竟不起是歲七月十九日也距成化丁亥六月二十八日得年八十有三公天性孝友痛二親祿不逮養每忌辰涕泣不已二兄湘涇旅窆滄峽宦游再至則

葺塚置田擇守者一日草奠詞有二鵲鵲繞樹悲鳴下棲塋所觀者感歎謂非偶然從兄弟有流落都下者挈之歸而衣食之其願留者振業之咸俾得所於姻故賓客無問戚疏率歡敘款洽雖閒出雅謔語不達理道聞人一善欣誦不忘至悼俗閑時輒形於色居常好讀書非疾疚不廢爲詩文不求甚工肆筆而成有請輒應善大書多巨坊名扁尤喜啟迪後進賁亭少時嘗與秦侍御武趙大參淵徐縣令商陳司訓繁侍講席咸荷曲成賁亭與商獲執暮年几杖每進謁必受益而歸而今則已矣於乎痛哉鄉人無老少靡不含悲會弔謀立石以紀且評其縉紳有概擬平生者則云務施澤物愛人忘

已有先憂後樂之志信誼攸孚鄉閭崇式有陝洛化德之風樂易優容與物無忤品題吟咏傲睨古今有花外小車之趣識者以爲不誣公初娶陳氏先卒贈孺人繼洪氏封孺人及亨之荷郊祀恩進公階通奉大夫二孺人加稱夫人子男三長卽亨之名雲程舉進士接武翰林歷轉廣東右布政使次雲翰早卒俱陳出次雲津側出女二長適指揮吳臣次適衛經歷施瓘孫男四松齡柏齡椿齡枏林其一二皆郡諸生女一適鄉進士戴汝愚曾孫男三瞻恩迎恩馳恩女二所著詩文十餘卷湖湘學政一卷判義六卷編韻名言二卷對偶菁華一卷亨之卜十月十一日奉柩襄事敬序而銘之銘曰

公之學豈惟詞章履德而光公之澤豈惟甘棠□及梓  
桑公之名有石競揚有祠無疆公之後有子趾芳有孫  
孔良於乎龍華之岡山深水長我銘公藏以永勿忘  
遺書

霞山文集十卷 見浙江通志今存凡賦一卷詩三卷序  
三卷記一卷雜著一卷誌銘祭告文一

蔡霞山先生文集序

霞山蔡先生台州臨海人登孝皇六年進士被選改翰  
林庶吉士授兵科給事中進右給事中擢湖臬僉憲督  
視學政歷貴藩少參閩藩大參汴藩方伯位望益尊乃  
疏乞休致撫臺巡院慰留不可竟辭去士論高之先生

通經學古造詣純正文詞典雅制作甚富壽踰八秩攷終正寢豕嗣鶴田大中丞收輯遺稿十卷江臬兵憲少峰林君爲校正授梓以傳屬節序其簡端節於先生同甲榜通朝籍先後出佐藩臬交久且篤謝事衰耄學殖荒落不足爲役而不容辭也夫文難言也秦漢以下作者繼出各成一家詞賦序記詩歌論贊諸體不同統而名之曰文文成章者也二賈諫疏而成其章也晁董敷對而成其章也屈原宋玉相如子雲騷賦而成其章也至於魏晉曹劉諸子詩而成其章也唐宋之盛李杜韓柳歐蘇王曾諸子文與詩各成其章者也蕭子姚子呂子之選輯皆可考見而未盡其全也是故文難言也霞



山先生之文春容大篇力追古作讀書中祕凡所著述  
遷固史傳也青瑣奏疏二賈條陳也大廷對制晁董敷  
張也敷歷諸藩揮灑詞翰序記以紀事詩賦以述懷歌  
詠以宣時論贊以表行出入於屈宋馬揚曹劉李杜韓  
歐諸子也君子謂先生之文粹於唐昭明之選東萊之  
鑑不足多矣文哉文哉霞山其我皇明之韓歐李杜哉  
雖然韓子之文日光玉潔周情孔思要其澤於道德仁  
義則原道原仁佛骨之表不可及也歐陽子之文經緯  
仁義參伍典墳與韓並稱要其言之可行用之利博則  
本論朋黨三術三弊五事之書不可及也李杜之詩光  
燄萬丈冠絕一代要之白天才縱逸神秀難蹤稱爲謫

仙甫學力閎深準繩具在號爲詩史不可及也先生兼其所長而時出之諸體成章各造其妙然則謂先生爲明之韓歐李杜不其然哉先生作王靜學忠節祠記不忘余而齒及焉余讀先生之文亦安敢忘先生而以荒鄙辭也昔人有言九原可作吾當爲之執鞭余於先生執鞭已哉謹序嘉靖三十三年甲寅春二月哉生明賜進士出身通議大夫資治尹刑部右侍郎致仕前都察院右副都御史奉敕總督漕運巡撫山東南畿劉節撰

郭協寅曰劉節字介夫號梅岡大庾人宏治乙丑進士著有春秋列傳廣文選梅岡集四十一卷內詩十

二卷附詩餘雜文二十九卷

謹按霞山文集卷一賦十四首卷二芸窗詩稿廿二  
首京華詩稿九十六首則登第後作湖湘詩稿六十  
五首則爲湖廣提學時作卷三貴陽詩稿一百首則  
爲貴州參議時作閩南詩稿一百十四首則爲福建  
參政時作大梁詩稿三十三首則爲河南布政時作  
卷四歸田詩稿二百九十四首則致仕後所作也卷  
五序類上四十二首卷六序類中四十六首卷七序  
類下三十三首卷八記類五十五首卷九雜著類一  
百四十四首卷十志銘廿六首祭告文七十首共計  
詩七百廿四首文四百十六首合賦十四首爲一千

一百五十餘首可謂富矣而三台文獻僅錄文五首  
詩十一首府志所錄尤少今因本集所載稍增一二  
而文獻府志所錄亦有所刪薙云

湖湘學政一卷

見千頃堂書目史部政刑類今佚

編次名言二卷

見千頃堂書目子部小說類今佚

對偶菁華一卷

見千頃堂書目子部類書類今佚

判義六卷

見蔡雲程鶴田集先府君行狀今佚

遺文

臨海志序

霞山文集卷七

經載道史載事均爲文也爲文不關於世教雖工何益  
哉古今俊麗雄偉之作何可勝計而春秋獨擬諸化工

綱目則之史家推爲宗祖繫世教焉爾郡邑之有志猶國之有史也所以稽往古厚風俗世道之升降人心之懲勸繫焉軒輊乖張是爲怨府徇私傷濫是爲笑具踵襲空疏是爲剽說弊斯極矣奚以稽古善俗爲哉蜀劉侯大直治教洽吾邑患舊志不愜意且曠闕踰四紀文獻多所遺逸毅然以修葺爲己任乃禮請鄉縉紳余文選寬高副憲賁亨主其事選庠彥侯曾唯吳應台梁棟陳朝明協相焉於是博采羣志詳詢耆舊會萃而損益之公是非嚴筆削舉凡立例準繩三史命意屬辭根柢六籍其於君臣夷夏之大分忠孝節義之宏綱一以春秋綱目爲法而拳拳注意焉閒出所獨得以爲序贊盡

祛羣志之弊足以服眾而傳遠雖達之天下可也時鉞梓過半劉侯膺召命入諫垣眾方以束稿散工爲慮繼而武陵陳侯仲錄以節推視邑政慨盛典不宜中輟乃咨於郡守南康周公志偉暨貳守南昌朱公世忠和衷協議益廩餼集梓工鉸束稿再閱月而告成於時新淦胡尹叔廉適抵任豫贊助焉一披閱閒善善惡惡之嚴令人感發興起而狂悖弗率者亦自沮喪不暇是大有闢世教也豈直土風人物之有稽典章度數之足徵已乎抑斯舉也始幸勑之有人中則慮夫失望未復抵於有成典章絕續之會人文顯晦之機無乃有數存焉誠非偶然之故也是不獨勑義修輯之可喜而成終畫一

之爲嘉是皆可書也當劉侯別余時嘗以序見屬爰次第其說俾來者知所考云

台州離政錄序

同上亦見府志

天下之利濟於通而病於拘天下之弊救於覺而狃於習是惟識治君子順其勢而利導焉耳法苟不便於民而徒膠泥成迹初無變通之術濟乎其閒雖日儆精神祇自勞耳豈直無益而已哉台爲郡僻處海隅無所擾費水陸之產足以具境內之需蓋亦樂土也獨鹽政與他州異民甚病之蓋煮海之利可以代食非若晉之凍池蜀之烹井永康采崖之艱且嗇也然鹽富而滯於貿易地僻而困於奔馳人情惡勞役厭濡滯閱數十年曾

無一商入境且并其批驗之所亦奏革入直爲民居矣  
特其歲供鹽課不減舊規邏卒百計取贏縱橫四出爭  
務邀剋以充數致令肩販島氓棄寘代食之貲徒手而  
返是以煎熬者墮易粟之圖山居者抱無鹽之戚茲非  
國計之所急民事之所當憂者所司非不知爲政概謂  
販者爲犯禁而不敢優容捕者爲勤稅而難爲禁止因  
循沿襲付之無可奈何久矣侍御江陵李公良伯奉璽  
書按浙悉心咨訪凡所以防弊源而益國計者興革靡  
遺乃嘉納台守許君仕引通融之策以城南浮梁爲總  
括喉襟建分署其地許肩販者舟載以由檄監郡林君  
鏢日紀驗大率十分而稅其一各授符信酌量折閱遠



近之程立限銷繳以防餘姦爲之別公私肅盤詰時啟  
閉稽出納莫不井井有條繇是課不匱而民亦足費益  
省而利愈饒蓋經理鹺政以便商民良法美意至是蔑  
以加矣仍慮其久或變更不無城復爲隍之弊乃具實  
上請敕戶部議以爲惠商益竈息盜安民無逾此法者  
聖明允賜施行永爲著令嗟夫許守斯策蓋嘗三上於  
當道而始遇夫李公乃今不徒行其言而復疏請以爲  
定例無乃窮民之遭際固自有其時耶慨昔淮鹽之法  
李沆以公行之而便蔡京以私行之而病解鹽之法盛  
度以義行之而利蔡京以利行之而弊均是地均是產  
也何先後之損益若是顧當事者用心何如耳監郡謂

是爲便民上策宜鉁梓傳播庶來者有所考焉以余亦  
嘗究心民隱者固請序之

重修臨海縣儒學記

霞山文集八

郡邑有學校所以陶鎔士類漸於誦習唐虞模範周孔  
出而匡弼致治以復太古之盛豈細故哉臨海儒學舊  
在邑治西南隅宋淳熙間劉令棟徙今地荐經兵燹隨  
廢隨葺率多因陋就簡廟與堂肩聯左右廡及官廨逼  
閭通衢藏修無地日惟升堂而散殊無師友漸摩之益  
徒爾奔馳寒暑不啻買櫝而還珠有志之士久以爲患  
宏治己未郡守維揚陳侯相周旋諦視咨嗟引咎得廢  
寺地百畝售民取直拓置鄰基三十丈章程百給區畫

井井役無奪時財無斂怨廟堂齋廡悉遵彝制旁翼號舍百楹閱三時工告成鐙火徹夜弦誦盈耳環橋觀聽耄倪衍衍嗟夫國家建學以造士內聖外王之真儒胥此焉出古今天下之先務孰大於是如使學有弗備有司之責也學旣備矣士或未之造伊誰責焉爰撫實直書俾後來爲政爲士者有所稽云

重修上蔡書院記

同上亦見府志

謝文肅公良佐字顯道汝寧上蔡人究竟鄒魯之奧記問該博對人稱引前史至不差一字事有未徹則頽有泚與游酢呂大臨楊時受業程門號四先生登元豐進士第建中靖國初官朝奉郎散騎尉召對忤旨坐口語

廢黜嘗別伊川一年自云所進但去得一矜字爾伊川  
稱其有王佐才所著有論語集解等書行於世詳誌宋  
史道學傳乃公生前事也台之有書院則公旣沒而黨  
禍未解其子克念者徙避居台朱給事中震訪遺逸奏  
官之黃守齋修郡志詢賢裔得克念子偕於庸流中優  
禮焉因祠公於學與饗廟食景定閒王守華甫勸建書  
院城東湖上請於理宗朝定謚文肅宸翰賜今額至元  
十三年燬於火浙東道宣慰使節齋陳公徙建於郡城  
元妙觀右卽今地也國朝宣德七年圯於暴漲按察僉  
事襄城辛公昉屬阮守勤卽故址新之旣而提學副使  
西蜀劉公瑞郡守顧公璘相繼加葺規制漸備迄今踰

二紀日就傾敝過者興怛侍御汝陽張公景持節東巡  
風裁凜若於凡古聖賢遺蹟多所表章是歲春按台冒  
風雨拜祠下瞻顧咨嗟久之乃檄郡判林君鏐出公羨  
若干緡用新舊觀慮譜牒之逸請於鄉大夫趙參政淵  
偕郡博士何君世祺輯敘之以足攷證慮後嗣之困給  
法雲崇梵廢寺田一頃令世掌以備烝嘗慮承祀之褻  
選族彥世登者錫儒冠服以稱祿薦僅閱月廟廡垣墉  
煥然告成林君謂盛事不可泯泯徵余記之嗚呼公非  
台產也亦未嘗耳提面命此邦人士也如使生無可法  
沒無可傳何流風餘韻感人之深如此哉傳曰德厚者  
流光公之謂也又曰獎忠義者及其子孫所以勸善侍

御公良有焉雖然獨愛不足以爲仁獨謀不足以爲智  
向微前後數君子尊賢重道同聲相應於其閒亦何能  
至是哉故余詳敘之且以啟夫後之同志者於時諸謝  
散處儒林坊及沙埠大澧芝溪應嶺長山凡六派衣冠  
百數輩聚拜相慶於祠下余因進而語之曰爲常人之  
後易爲賢人之後難凡門第崇高可畏不可恃也蓋嗣  
續箕裘之責才德難爲稱小有疵類眾得議而訾之故  
爲賢裔者學宜加勤行宜加勵庶得比他人耳此柳玘  
所以惓惓爲子弟戒也謝氏固多賢今而後萬一有可  
議焉豈唯有忝於厥祖抑亦重負侍御公之盛心而且  
貽我以不知言之愆也可不念哉眾皆曰唯唯

台州府預備倉記

同上

嘉業堂刊

國家設荒政以存流殍猶人蓄水火以資利用不可一日無者也法久政敝民未蒙惠而先貽其病是以具利用者反焚溺焉君子在位安忍坐視其斃而莫之拯救耶台爲郡屬邑六其地阻山瀕海民不得以舟車適四方磽瘠耕耨之所入僅以謀饗飧稍罹饑饉輒嗷嗷仰哺於官故其積貯以備賑者視他郡爲尤急然所積粟率多取諸斷贖舊爲廩所二一在永盈倉北偏一在天寧寺西南隙地皆以雜貯郡縣斷贖之粟歲編廩人入戶守焉當夫新舊交承之際官唯取足乎原入之額曾何計其鼠雀紅腐之虧愈久愈耗乃至破常產鬻妻孥

殞越刑戮猶未能償其責民之應役如赴水火上之人或忽焉而狃於因循之習或念焉而未得處分之方民病甚矣三山許公繼由戶部尙書郎出守茲郡才敏志勤憂民如飢渴乃根源羣弊殫心經畫慮厚蓄重爲民累也不徒救諸目前厥惟根株悉拔爰度編氓之多寡以爲儲積之盈縮計里於縣計戶於里如臨海爲里一百五十有二每里戶百有奇大約遇凶歲戶賑五斗宜儲粟八千三百六十石餘粟則平價易銀貯之庫以備賑焉各屬準是於倉北剏廩十楹特貯輸府之粟曰府預備倉分原額內廩人五戶守之在天寧者特貯附郭輸縣之粟曰縣預備倉分廩人三戶守之餘屬五縣各



仍舊僉二役守焉凡縣儲以百石爲率府則倍之縣儲各備縣之賑府儲統備縣賑之不足廩人則挨年而輸其役分廩而稽其耗每交代查理時役竣而粟贏者徑令歸業役竣而粟不及者責其償釋之耗免濫賠而責償也易糶必騰價而從令也輕於興滯補敝之中而寓夫出陳易新之法盈虛以調奇羨以均荒政立而民困蘇舉百餘年纏縣沈痼之民瘼一洗而清之何光明俊偉如之已乃得請於巡按御史謝公蘭暨分守參議胡公廷祿分巡僉事蔣公舜民咸嘉獎而贊其決經始於嘉靖癸巳春再閱月工告成費出修倉貲羨民罔知勞老稚歡呼不啻已溺而登之岸將焚而脫之災也董營

建者臨海丞邵駉任查理者黃巖丞湯寶臨海簿邵良大也臨海令尹君賢圖惟昭光鴻烈構亭礱石於廩東徵余文記之嗟夫積貯者天下之大命也求以養之而反危之其如先王之良法美意何哉宜仁人長者憤心扼腕力任其責而不遑一日寧處也公善政不盡書茲記其理財一節耳允蹈而修舉焉不能無望於後之君子

勸建惠民藥局記

守令民之司命也生而遂其養死而得所歸疾疾賴之以療理司命之職於是乎備矣古閩許侯繼守台踰三年凡可以惠吾民者罔不殫厥心力而於養生送死救

患之節尤拳拳焉往年徭民疲於守倉之役侯目擊困  
敝展轉百憂乃爲之稱停區畫程久近計盈縮酌爲定  
規而民困以蘇養生之惠非一端而預備倉之制爲先  
務往年窮民無所殓多暴露四郊乃爲之購隙地樹周  
垣城南北各闢鉅墟俾遺骸蒙蔭蓬顆送死之惠非一  
端而義塚之制爲先務往年藥局寄空名於廨署鬪訟  
桔槔之徒日叢混於頽垣敗壁閒凋瘵餘黎實未始霑  
一餌之惠所謂官給醫藥者銷沈於文具久矣頃歲大  
疫民皇皇無措侯內推至誠飭已正事捐俸置藥物選  
醫士典之審因辨脈酌施良劑瀕危更生者不可勝紀  
復慮非經久計乃遷申明旌善亭於大門左右示民知

所向卽亭之舊址爲藥局五楹翬飛鱗次繚垣於其外  
工再閱月渠渠焉改觀矣益以廢寺田二頃檄世醫學  
官會其租入以備藥貲擇善醫十數輩日輪二人事事  
旬浹而更可久之道也卹患之惠非一端而藥局之制  
爲先務孟子曰堯舜之知而不徧物急先務也至其論  
王道亦首以養生送死爲言若侯之子惠困窮究心民  
瘼如此其急又深合於周官醫師掌醫之政令使侯久  
借於台惠政寧止於是使天下郡邑皆若是雖唐虞之  
世何以加諸余姻家典膳陳淮寶奉檄董斯役因請記  
焉嗟夫醫藥者聖人仁天下之術古之君子有仁民之  
心而無行道之地恆從事醫藥以見志侯有仁民之心

而又乘乎一方司命之權宜其仁術之大行民亦惟惠之懷也異時位益峻權益重其爲惠又當何如哉是可書也其田數疆理具載碑陰俾後之君子有所攷而終其惠

萬里林通道記

四方所需貨率多取諸閩產然道里阻山海海患劇風波隄寇盜商販不得已挈命而冒險游者千一萬一焉陸行自杭衢入計程逾月至自金處入計程弔月至如取道台溫僅浹旬而至捷則捷矣第自平陽迤南歷福寧寧德羅源連江諸州縣出入林莽數澤間凡六百餘里寇盜豺虎縱橫作祟甚於泛海之險遂名其林曰萬

里蓋苦其險遠而所謂捷便者不足道矣越福寧一舍  
曰鹽田支海橫截乎通衢潮退陷爲泥淖公私雖甚急  
必候潮而後進舟者索直恆數十倍羅源連江之界曰  
朱公橋爲劇寇淵藪非結旅百十輩非晴日當午則道  
無行人潘渡舊有梁圯於暴漲隔岸若天涯操楫者索  
利如鹽田行旅病甚北嶺去省城僅四十里旁多歧徑  
余音蛇夷依憑爲寇倏往忽來遐邇相戒咸稱爲畏途莫  
敢向往自余爲諸生時稔聞其故竊有埽除之志其道  
無由也嘉靖二年承乏閩藩銳意平治乃倡義捐俸并  
取諸贖罪者貲力指授芟除要法募民肆力翦闢芟履  
程課再閱月而險阻悉平廓爲坦道樵歌牧唱藹焉頌

聲於舊日叢密根株閒見被掠篋笥之屬罹害枯骨纍  
纍然觀者駭焉依鹽田山麓關路三十里增置李園鹿  
灣諸郵舍人得舍舟循陸听夕履坦無復前時候潮之  
艱潘渡任溪皆建橋飛鸞北嶺皆設關每五里置一亭  
爲休息避暑之地由是楚浙入閩之人鮮不由斯道者  
然足以慰吾未仕時埽除之願亦一快事也羅源令吳  
周連江令陳賢目擊其事乃願有紀焉姑述其概以語  
同志若曰敘功勞則吾豈敢

按霞山文集卷九有便  
民事狀與此大同小異

嘉荔說

霞山文集卷九

嘉靖戊申冬吾郡伯楊南溟先生見遺嘉荔三百顆殼  
薄而圓瓢厚而瑩核細如丁香風味芳馨迥異常品蓋

平生所翫見者因憶余昔仕閩藩見其新熟時綴如霞  
錦籠膜如桃花剖如水精之凝啖如絳雪之消已謂果  
中之極品矣乃若此品之嘉吾不知鮮穠時又當何如  
也爰走書致謝詞多珍頌竊復自疑世有淺於體物者  
時或妄詆爲口腹之美稱許過情有若蒙泉岳公之論  
豈不貽累珍果耶岳嘗評荔子謂北土葡萄足以當之  
若遇玉消香水自可北面且謂土人護短不以爲然噫  
余非閩人荔非浙產也雖姓同端明而議無黨比復何  
護短之嫌而敢盡廢天下公論夫荔冠百果輿論久傳  
固非託始於端明之撰譜也何以言之嘗閱列仙傳盛  
稱食其花實者謂荔枝仙人葛洪謂荔有蠲渴補髓之



益本草亦表其功司馬相如張九齡皆作賦以寄意白居易詠且圖焉至歐陽永叔又以花中牡丹作配彼豈皆有鄉土之暱而均爲護短者耶乃若西域葡萄之比斯爲魏文帝之繆論無乃南北斷隔其所擬特出於傳聞而未嘗親見貢新者乎是宜君謨慨惜嘉實產於僻遠不堪移植上都且莫可及時鮮獻曾不得班於盧橘江橙之右以少發其光彩此荔枝譜之所由作歟譜列品三十有二其最爲狀元香而號名火山者爲之殿無乃南溟餽我以最品而見貶蒙泉者其火山之流歟雖然最與殿在已遇不遇係乎人荔亦何庸情於欣戚耶尙幸食而知味者多而世之讀岳文者苦不數數也

車戒

同上亦見三台文獻

逸休先生居洛下八十年未嘗一日不讀書潛心聖學  
灼然燭事理恆計人禍福於幾先罔或不應驗人以爲  
神通嘗閒行郊外遇有商販虞孚者厚其載以貨於洛  
日且仄違城市尙舍許懷音促急趨意倉皇不循軌轍

問蚤暮之節於先生答曰宜調爾轡舒爾御範爾馳驅

雖暮尙可到急則不能也孚怒目抵憤謂先生迂且誑

箠策甚急兼步疾驅電歟而颿旋矢激而霆迅揚揚然

拊軼呼噪飛塵蔽天日茫乎若憑虛而莫知所指未數

里側越峻阪左凹

音

右凸

音

謹聲聞遠社而車覆矣輪

傾輻敗蓋折軫虧貨毀歷過半震愕噉號僅以身脫輶

理漸向暝竟止於郊外謁拜先生寓所願聞先知之故  
答曰吾非識緯術數之學洞觀古今據理審勢而必然  
也不聞孔子云欲速則不達見小利則大事不成吾豈  
教汝緩不及事哉昔晉陽處父以剛愎敗乃事鄭子陽  
以迫隘災其身前車之覆後車之戒也能如西門豹佩  
韋以自緩董安于佩弦以自勵均其緩急使之調和何  
以至此極乎媿謝而去雖悔無及矣靖州馮生鑾發跡  
轅門初授天台令其於禍福之機軸倚伏之途轍領受  
余門舊矣因其請教之勤述往事作車戒貽之

儒吏箴

同上

周官九兩曰道與治孔門四科文學政事才行兼優斯

稱儒吏嗤腐詆俗始歧爲二吳公文翁漢廷拔萃虞溥  
韋丹晉唐標異元祐涓熙亦多蓋臣震耀史冊接步要  
津一資半級皆可福民天非嗇我彼獨何人自期譴陋  
致遠孰因詩書法律用光刀筆殘刻舞文罔惟陰陽寅  
畏憲章端厚心術廉慎忠勤有孚元吉一或反是得不  
償失勿忌勿爭守謙戒盈無見小利無欲速成懲彼覆  
轍履坦利貞念爾所生思貽令名

按讀此篇可以知先生之所志讀前篇可以知先生  
之所學

開平大惡灘祭告靖安鄉社神文

霞山文集卷十

天地以好生爲德聖人以除害爲仁是故舟楫濟川厥

德溥矣灘石作梗害豈淺哉潮志存匡濟心切憂民民  
害未除寧遑寢食今特捐資募役倡義興工於以蕩橫  
梗之灘沙去中流之礮石期欲平如砥直如矢永俾往  
來之舟坦由平順之港急流洗大惡之名摩厓刻大善  
之扁似非易易然者所冀天時晴霽地利疏通人力協  
從工程立就非藉明神默相於冥冥疇敢必其然哉潮  
無任激切懇祈之至

勸建三江濟川堂造舟捨田祭告城隍社令文

同上

蓋聞剡舟剡楫以濟不通服牛乘馬以通遠道古聖人  
所爲開物成務天下後世所爲利用厚生莫不有神司  
於其閒惟茲三江之渡公私四達之途其奈西澣善崩

東涯易漲官舟虛應故事引別渚而幽藏私楫巧於取  
財停中流而索價兼以浮沙陷命洿淖裂膚豈勝晨夕  
之淹尤苦冰霜之厄民病極矣神忍聞乎茲欲剗疏岸  
而砌漲塗製巨舟而築新埠更將渡頭立館爲商旅昏  
夜之投堂側置田資篙師衣食之費礱石紀事俾之經  
久遵承固人所快覩也亦神所樂聞乎巨川蒙利濟之  
益坦途無病涉之嗟某至願也敢告按讀此二篇先生  
之好義勇爲濟人  
利物之心略  
見一斑矣

遺詩

早春過長崙訪劉太僕梅雪翁

湖湘詩稿

登臺見長崙嶙峋入晴昊蔚藍佳氣中疑有商顏皓浚

晨巾我車去去雲山渺相逢梅雪翁幽居似蓬島辭榮  
九棘班求閒挂冠早開筵喜客留豪吟發天藻心醉情  
更怡真醕謝輕矯餘興欲何爲飄然付花鳥

題三山林戶侯松澗圖

閩南詩稿

將軍好武仍好文壯年意氣凌秋雲三尺龍泉光射斗  
長風入座飄香芸生綃不染胭脂色碧澗喬松寫標格  
轟雷濺雪瀉晴虹舞鳳飛龍迴石壁蒼顏烈氣生毫端  
未許尋常俗眼看披展行臺當六月風韻逼人毛骨寒  
家山豈無松與澗塵土因緣久羈絆有時暫遇惜匆匆  
畫裏相逢重流盼

象石驛

湖湘詩稿

暝色迎新月停舟水驛門象形高岸石魚網數家村老  
樹疏寒葉平沙出漲痕登樓瞻北斗孤興共誰論

宿長沙開佛寺

乘月投孤寺江皋十里程磬餘仙梵起林罅佛燈明客  
況逢秋爽禪房近水清無營情自適隨遇樂吾生

宿懷化驛

貴陽詩稿

落日溪風急新春客袂寒蠻山隨澗轉驛舍傍雲看鳥  
見投林盡人嗟行路難盤桓心百折歇馬已更闌

過西山道院

瑤宮向水開清極絕塵埃松下仙人竈雲閒老子臺逢  
春桃正發弔古客重來最愛藤蘿月分光到碧苔



太湖道中

剛道詩稿

按此詩由貴赴剛途中作也

嘉業堂刊

抗疏求歸切徵書幾度催  
楚山過寺盡吳樹向人來  
淡影隨孤月寒香傍野梅  
遠峰雲未淨欲去且徘徊

送恥軒施司訓歸省重闈

京華詩稿

梧葉初晴霜葉飛黃金臺下  
送君歸潞河酒盡孤帆遠  
關塞雲深過雁稀暫捲斑衣辭華省  
遙憐白髮倚重關  
蘆花颯颯添愁緒鄉話綢繆對落暉

自咏

歸田詩稿

不怨不尤心似水憂民憂國鬢如霜  
勞勞三萬六千日  
半爲橋梁道路忙  
按讀此詩可見先生雖家居而憂國  
憂民爲善不倦如此宜其後嗣之興  
興也

台學統卷七十四

台學統卷七十四 詞章二十一

吳興劉氏